

JESUCRISTON' BZEJN'IDE' SAN JUANNA' CHE DA' CA' ZA' GAC

Diosen' bzejni'ide' Jesucriston' diža' quinga

¹ Diosen' bzejni'ide' Jesucriston' diža' quinga cont le' gwlo'ede' bene' ca' chesejnilaže'ne' can' ba zoa gac. Nach ba gwsele' to bene' nac angl che' cont bzejni'iden' neda' Juan, neda' naca' ben' chon xšine'. ² Na' chzoja' diža' li che yogo' da' ba ble'eda', na' nezda' da' li gwna Diosen' gac quinga, le Jesucriston' bzejni'iden' neda'.

³ Mbalaz bene' ca' yosolab da' nga chzoja' da' bzene Diosen' neda' na' bene' ca' yesende' yosolab bene' yoble len, še da' li yosozenague' chen, le ba zoa gac can' žanna'.

Juanna' chzoje' bene' ca' chesonxen Jesucriston' yež ca' gaže

⁴ Neda' Juan chzoja' le'e nita'le gaž yež che Asia chdop chžagle chonxenle Jesucriston'. Diosen' len Spiritw chen' yesenita'sque' yesaclene' le'e na' yesone' soa cuezle binlo len xbab chelen', Dios ben' ba zoacze' cate' bina' xe yežlion', na' soacze' toli tocanē. Na' Spiritw che Diosen' naquen ca gaže spiritw na' zoan lao Diosen' gan' chi'e chnabi'e.

⁵ Na' Jesucriston' lecze soašque' gaclene' le'e na' gone' soa cuezle binlo. Jesucriston' naque' ben' cho'e diža' li che Diosen'. Naque' bene' nechw bebane' ladjo bene' guaten' ben' bich nabia' yela'

goten' le'. Na' le' chnabi'e yogo' nochle bene' gwnabia' že' yežlio nga. Dan' chacde' chio' bnežjw cuine' gosote'ne' na' blalj xchene' cont bnitlagüe' xtolā'chon'. ⁶ Nach ba gwleje' chio' cont nabia'cho txen len le' ca no rey na' cont soacho gonxencho Diosen' ca no bꝛoz, Dios ben' nac Xe' na' lecze naque' ben' chonxene'. Cheyalā' gonxenchone' toli tocanē, le zoacze' chnabi'e toli tocanē. Can' gonšcaczcho.

⁷ Jesucriston' yide' da' yoble to lo' bejw, na' yogo'lol bene' yesele'ede' le', lente bene' ca' gosot le'. Na' bene' ca' že' to to latje lo yežlion', yese-bežyaše' cate' yesele'ede' le'. Can' žia', na' can' gacšca.

⁸ “Neda' naca' Dios ben' ben yežlion' len yogo' bichle da' de, na' naca' ben' gon cont te chen. Da'nan' zaca'lebda' ca letr nechw da' nzi' A na' letr bzebe da' nzi' Z.” Can' ža' Xancho Dios ben' nape' yelā' guac xen juisyw, ben' ba zoacze' cate' biṇa' xe yežlion' na' soacze' toli tocanē.

Juan ble'edaogüede' leca bene' zaca' juisyw nac Criston'

⁹ Neda' Juan naca' bene' lježle dan' naccho txen chzenagcho che Jesúsen' cont Diosen' chnabi'e yichjlažda'ocho, na' toz can' chosoči chososaca' bene' chio' neche xtižen', na' txen chaclen Jesucriston' chio' cont chyo chchejcho len yogo' da' chac checho. Da' ba gwdixjue'eda' xtiža' Diosen' na' ba bia' diža' che Jesucriston', da'nan' gosezene' neda' na' gosesele' neda' pres gan' že' Patmos dan' nac to yežlio dao' lo' nisdan'. ¹⁰ Na' to ža' dmigw Spiritw che Diosen' benen cont ble'edaogüeda', na'

benda' Jesucriston' chne' cožan' zižjehgua ca ga chbež trompeta. ¹¹ Na' gože' neda':

—Neda' naca' ben' ben yežlion' len yogo' bichle da' de, na' naca' ben' gon cont te chen. Da'nan' zaca'lebda' ca letr nechw da' nzi' A na' letr bzebe da' nzi' Z. Bzoj to le'e yiš da' quinga le'edo', na' selon' lao bene' ca' nita' gaž yež che Asia chese-dop chesežague' chesonxene' neda', yež ca' zjanzi' Efeso, na' Esmirna, na' Pérgamo, na' Tiatira, na' Sardis, na' Filadelfia na' Laodicea.

¹² Na' gwyechja' gwna'a non' chne na' ble'eda' gaže candelers de oro. ¹³ Na' gachol candelers ca' gaže, ble'eda' to bene' nac ca to benach perw goche'eda' bi naque' benachze. Nyaze' to lache' ton da' bžinte lo ni'e na' nchej cho'alcho'en ca to bant de oro. ¹⁴ Na' yiša' yichjen' naquen da' šiš ca xa xila' o ca no beye'. Na' yejlagüen' gosactiten ca to yi' da' chala'nin. ¹⁵ Ni'e ca' ble'edan' ca to de bronce da' nlachgua cate' naquen ya'alj x oan lo yi'. Na' ši'en nenen zižjehgua ca chziž yegw cate' dechgua nis. ¹⁶ Na' noxe' gaže beljw len ne'e lichan' na' lo' cho'en chchojen ca to spada da' nla chop la'an. Na' cho'alagüen' goctiten ca gwbiž cate' chna'chguan.

¹⁷ Na' cate' ble'eda'ne' gwbixa' xni'en gottia' šlat. Nach bli ne'e lichan' gwxo'en yichja' na' gože'nda':

—Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te chen.

¹⁸ Naca' ben' nsa' yela' mban. Cana' gota' perw bebana' ladjo bene' guat na' zoacza' toli tocanē. Na' naquen lo na' nia' bat yesat to to bene' na' nac gac chegaque' cate' bach gosate'. ¹⁹ Na' na'a bzoj diža' che da' ca' ba ble'edo' na' diža' che da' ca' chac na'a na' diža' che da' ca' za' gac. ²⁰ Na' da' nono na'

neze che beljw ca' gaže dan' noxa' na' che candler
de oro ca' gaže, zejen quinga: beljw ca' zejen
gaže bene' ca' cheso'e xtiža' len gaže cuen bene'
ca' chesedop chesežag chesonxene' neda' gan' nzi'
Asia. Na' candler ca' gaže zejen gaž cuen bene' ca'
chesonxen neda'.

2

*Da' gwna Jesucriston' che bene' ca' chesonxen le'
lo ciuda ca' gaže: Da' gože' bene' Efeso ca'*

¹ 'Bzoj ben' choe' xtiža' len bene' ca' chesedop
chesežag chesonxene' neda' lo ciuda Efeson',
yo'one' neda' noxa' beljw ca' gaže len na' lican'
na' chda' gachol candler de oro ca' gaže, na'
yo'one' nedan' chapa'ne' diža' quinga: ² "Neze
nle'eda' ca' güenna' chonle, can' chchejlaže'le
zoale chonchgual xšinan'. Neza' bi chleble
bene' cheson da' xinj, le ba ble'ele can' cheson
bene' güenlaže' ca' chesene zjanaque' postlw na'
chache'ele bi zjanaque' dogualje postlw. ³ Ba
byo bchejle len yogo' dan' ba goc chele na' ba
benchgual xšinan' na' bi jaxaque'laže'le. ⁴ Perw
da' nga bi chazlaža' can' chonle, da' bich chaquele
neda' can' goquele neda' cana'. ⁵ Da'nan' le gon
xbab can' gwzoale goquele neda' na' can' gwzoale
bzenagle chia' na' yetinje xtolale'le cont da' yoble
gonle güen can' benle cana'. Na' še bi yetinjele
xtolale'len', yedeyena' cont bich gacle candler
chia'. ⁶ Perw la'czla' bi chontecle güen, chebeda'
chgue'ele da' xinj da' cheson bene' ca' zjanzi'
nicolaítas, bene' ca' chesene' guac gontezechle
da' xinj, le neda' lecze chgue'eda' can' chesonen'.

⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', neda' gona' da' gagwle da' chbia lo yag yela' mban da' zoa latje xdan che Diosen'."

Da' gože' bene' Esmirna ca'

⁸ 'Na' na'a bzoj ben' choe' xtiža' len bene' ca' chesedop chesežag chesonxen neda' ciuda Esmirna, yo'one' naca' ben' ben yežlion' na' len yogo' bichle da' de na' ben' gon cont te chen, ben' lecze gote' na' bebane' ladjo bene' guat ca', na' yo'one' nedan' chapa'ne' diža' quinga: ⁹ "Neze nle'eda' ca güenna' chonle. Nezda' chyi chzaca'le. Nezda' nacchgualle bene' yaše', la'czla' de chele da' zaca'ch clal ca yela' gwni'an'. Na' ca nac bene' Israel bene' ca' chesene' ba gwlej Diosen' legaque' cont gone' güen len legaque', nezda' bale' chesenie' yela' ya' chele. Perw bi gwleje' ben' cheson ca', le bi chesejnlaže'ne', san zjanaque' dapa' txen chosozenague' che Satanás dan' chn-abia' da' xigüe' ca'. ¹⁰ Bi žeble da' ca' za' gac chele, le Satanásen' gonen cont yeseyixjue' balle ližya cont gata'bia' še soen gonen cuejyichjle xtižan'. Na' lo to chope ža yosoči yososaque' le'e. Le soateze le gwzenag chia' la'czla' še yesote' le'e, na' gona' cont banle len neda' toli tocanē. ¹¹ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yesezaca'zi' toli tocanē dan' žacho yela' got gwchope."

Da' gože' beṇe' Pérgamo ca'

¹² 'Na' bzoj ben' choe' xtiža' len beṇe' ca' chese-dop chesežag chesonxen neda' ciuda Pérgamo, yo'one' neda' napa' spada toše' dan' nla chop la'an, na' nedan' chapa'ne' diža' quinga: ¹³ “Neze nle'eda' ca güenna' chonle. Na' nezda' zoale lo ciuda gan' chnabia'chgua Satanásen', perw zoale chzenagle chia'. Nezda' bi chbejyichjle xtižan' dan' chejle'le na' neca gwlejyichjlen cate' gosote' Antipas ben' be'e xtižan' lo ciuda chelen' gan' že' beṇe' zan beṇe' chosozenag che Satanásen'. ¹⁴ Perw de to chope da' chonle da' bi chazlaža'. Le nita' bal le chzejni' i lježle guac gontezle da' xinj. Ca'cze nac dan' bzejni' i da' Balaam da' rey Balac cani'. Da'nan' gwsele' no'ole gosego'oyele' beṇe' Israel ca' cont gosagüe' yela' guagw da' nac che l gua'a lsaca' gosejnilaže' beṇe' zito' ca' na' cont gosone' da' yela' zto' len cuerp chegaque'. ¹⁵ Na' lecze nita' bal le chzenagle che dan' chgue'eda' dan' chososed chosolo'e beṇe' ca' zjanzi' nicolaítas. ¹⁶ Da'nan' le yetinje che da' xinjen' chonle. Na' še bi yetinjele xtola'len', la' yidtia' yedetillena' nole chonle da' xinjen' len spada dan' chchoj choan'. ¹⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', goṇa' le'e to yela' guagw da' zaca' da' nono na' le'e lo yežlion', to da' zaca'leben ca maná, na' goṇa' to yej šiš che to tole gan' yoj lale da' naquen to lale da' cobe da' nono nombia', lete le'e gaquen lo na'le gombia'len.”

Da' gože' beṇe' Tiatira ca'

18 'Na' bzoj ben' choe' xtiža' len beṇe' ca' chesedop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chac-tit yejlagua' ca to yi' da' chala'nin na' ni'a ca' chesaquen ca bronce da' cheyac ya'alj cate' xoan lo yi'. Yo'one' neda' chapa'ne' diža' quinga: 19 "Neze nle'eda' ca güenna' chonle, nezda' zoale chaquale neda', chejnilaže'lenda', chonchgualle xšinan' na' chchejele bite'teze chac chele, na' nezda' chonchle güen na'a clal can' benle cana'. 20 Perw de to da' chonle da' bi chazlaža', le choe'le latje zoa to no'ole naque' txen len le'e, no'olen' zaca'lebe ca da' reina Jezabel. Že' chsed chlo'ede' xtiža' Diosen' perw len diža' güenlaže' chen' chziye'e beṇe' chesejnilaže' neda' cont bale' chesone' da' nac da' yela' zto' len cuerp chegaquen' na' lecze chesagüe' yela' guagw da' chesena beṇe' naquen che l gua'a lsaca' chesejnilaže'. 21 Ba gwleza' cont yetinjde' che yela' zto' dan' chonen', perw bi chaclaže' yetinjden', na' bina' cuejyichje' yela' zton' chonen'. 22 Da'nan' gona' cont gacšende' na' gate' lo cam, na' gona' cont beṇe' ca' cheson yela' zton' txen len le' lecze yesale'chgüede' še bi yesebejyichje' da' ca' chzejni'ide' legaque' yesone'. 23 Nach bi' che' ca', gona' cont yesatbe'. Nach yogo' cuen beṇe' ca' chesedop chesežag chesonxene' neda' gate'teze yesache'ede' nombi'a yogo'te xbab da' yo'o lo' yichjlaždao' beṇač, na' gona' cont to toe' soe' mbalaz o saca'zi'e con ca nac da' ba bene'. 24 Na' le'e zoale Tiatiran' le'e bi chonle can' chsed chlo'e no'ole güenlažen' na' neca nsedle dan' chesene' chesejni'ide' che Satanásen' dan' nono nombia', bi nia' bichle da' cheyala' gonle. 25 Con

soaczle gonle da' güen can' chonle tža tža, cont ne' chonle güen caten' yida' da' yoble. ²⁶ Note'tezle še soele bi cuejyichje xtižan', na' še soele ne' soatezle gonle can' nona' mandadw cate'ch yida' da' yoble, gona' cont nabia'le nación ca' txen len neda'. ²⁷ Ca Xan' ba bene' cont chnabi'a nación ca', lecze can' gona' cont bene' bi yesebejyichje' xtiža' yesenabi'e txen len neda'. Na' yesenabi'e nación ca' na' žan ca žan bene' nación ca' yosozenague' čhegaque', na' bene' ca' bi chosozenag, yosožiaye'e legaque' ca to bene' chxoxj to no yeso' xguague. ²⁸ Na' gwnežjua' legaque' beljw xsilen'. ²⁹ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

3

Dan' gože' bene' Sardis ca'

¹ 'Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Sardis, yo'one' napa' Spiritw che Dios dan' nac ca gaže spiritw, na' noxa' beljw ca' gaže, na' neda' chapa'ne' diža' quinga: “Neze nle'eda' yogo'lol dan' chonle. Nezda' nacle ca bene' guat la'czla' chze chele nable yela' mban toli tocanē. ² Le gon xbab can' chonle na' le šejnilaže'ch neda' na' le gwzenag chia' šlac biṇa' yeyož cuiayi'le, le dan' chonlen' bi naquen can' chebe Dios ben' chonxena'. ³ Le soa le gon xbab che xtižan' dan' bosozejni'i bene' le'e na' da' bzenagle chen cana'. Le gwzenag chen na'a da' yoble cont yetinjele xtoła'len'. Na' še bi gonle xbab yetinje xtoła'len', žin ža yedexenyala' le'e na' gona' castigw chele ca chzenyal to no bene' gwban

cate' chbane'. Bi nezele bi ža bi hor. ⁴ Bia'cze nita' balle bene' Sardis bina' gonle da' malen' txen len bene' yezica'chle. Na' le'e nac lažda'olen' xilaže' len neda', žin ža gona' lache' šiš chazle na' talenle neda', le zaca'le cont gonle neda' txen. ⁵ Note'tezle še soele bi cuejyichjle xtižan', žin ža gona' lache' šiš chazle, na' gwbat yoxia' lalen' le'e libr chia' gan' nyoj la yogo' bene' zjanape' yela' mban toli tocanē, na' güe'lēna' Xan' diža' na' len bene' zjanac angl che' ca' yapegaca'ne' nacle neda' txen. ⁶ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

Da' gože' bene' Filadelfia ca'

⁷ 'Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Filadelfia, yo'one' naca' bene' laždao' xilaže' juisyw, na' zoateza' chona' can' gwnia' gona'. Napa' xinya che da' rey David. Cate' chsaljua' cont yeso'o bene' gan' zoa Diosen' chnabi'e, nono gac yosejyw, na' cate' chseyjua' cont bi yeso'e, nono gac saljw. Yo'one' neda' chapa'ne' diža' quinga: ⁸ “Neze nle'eda' ca güenna' chonle. Nach ba gwsaljua' ca to puert che le'e da' nono gac yososejyw. Na' la'czla' bi nac zanle, ba chzenagle xtižan' na' bi gwlejjyichjlen caten' bosochi bososaque' le'e. ⁹ Bal bene' Israel že' gan' zoalen' chesene' ba gwlej Diosen' legaque' cont gone' güen len legaque', perw bi gwleje' legaque', le bi chesejnilaže'ne'. Zjanaque' dapa' txen chosozenague' che Satanás dan' chnabia' da' xigüe' ca'. Na' ca' nac legaque', gona' cont žin ža

yesape' le'e bala'an cate' yesache'ede' chacda' le'e.
¹⁰ Ba byo bchejle len yogo' dan' gwdi gwxaca'le
 na' benle can' nona' mandadw, na' da'nan' gona'
 yechojle güen cate' žin ža saca'zi' yogo' benač.
 Cana' gata'bia' che to to benač še yosozenague'
 chia' o še bi yosozenague'. ¹¹ Ba zoa yida' da'
 yoble. Le soačhač le šejnilaže'nda' na' gwzenagle
 chia' cont bibi gwžon soale mbalaz toli tocaņe.
¹² Note'tezle še soele bi cuejyichle xtižan', žin ža
 gona' gacle ca bdope da' zjanita' lo' yodao' blao che
 Dios ben' chonxena', le yežinle gan' zoa Diosen'
 na' yega'anlenle' toli tocaņe. Na' gwzoja' loxga to
 tole la Dios ben' chonxena' na' la ciuda che', ciuda
 Jerusalén da' nac da' cobe da' chi' yaba na' yetjen
 lo yežlion'. Na' gwzoja' loxga to tole la neda' da' nac
 da' cobe. ¹³ Le'e žia nagle da' chene, le gwzenag
 che dan' ža Spiritw che Diosen' chen' le'e chdop
 chžagle chonxenle neda' gate'teze.”

Dan' gože' bene' Laodicea ca'

¹⁴ 'Na' bzoj ben' choe' xtiža' len bene' ca' chese-
 dop chesežag chesonxen neda' lo ciuda Laodicea,
 yo'one' chona' cont chac can' chnalaže' Diosen'.
 Cho'a diža' li da' nac cayanen' che' Diosen' neda'.
 Txen len neda' ben Diosen' benač na' yogo'lol
 bichle da' de le'e yaban' na' lo yežlion'. Yo'one'
 neda' chapa'ne' diža' quinga: ¹⁵ “Neze nle'eda' ca
 chonle, bi nacho chgue'ele neda' na' neca chaquele
 neda'. Yebechda' šaca' chgue'ele neda' o šaca'
 chaquele neda'. ¹⁶ Na' da' bi chonle cuent gaquele
 neda', da'nan' ba zoa cuejyichja' le'e bich gona' le'e
 ca xi'ina'. ¹⁷ Le'e žale zoale mbalaz, žale chonle
 da' güenchgua, žale bibi chyažjele le chebechgüe

Diosen' le'e. Na' bi chache'ele leca bene' zban nacle len Diosen'. Bi chache'ele nacle ca to bene' bi chle'e o ca to bene' laže' ga'alyid da' bi chejni'ile xtižan' neca chzenagle chen. ¹⁸ Da'nan' chnia' le'e cheyała' si'le da' goṇa' le'e, le naquen da' zaca'ch ca oro dan' ba bosozeye' cont bega'an da' dogualje. Si'le da' goṇa' le'e cont da' li soale mbalaz. Na' le nab yezi'xena' xtoła'le cont gac lažda'olen' xilaže' can' chac xalana' bene' nyaz to lache' šiš xila'. Gonle ca' cont bich le'eda' le'e ca to bene' laže' ga'alyid, bene' cheyała' gaque zto'. Na' le güe' latje yocoba' xbab chelen' cont bich gacle ca to bene' bi chle'e, bene' chyažje rmed che yejlagüe' cont le'ede', san gacbe'ele da' chaclaže' Diosen' gonle. ¹⁹ Note'teze bene' chacda', chdila'ne' na' chnežjua'ne' castigw cate' chone' da' xinj. Da'nan' cheyała' cuec yichjle yetinjele xtoła'len'. ²⁰ Chnia' to tole ca to bene' zecha cho'a yo'o chelen' chnie' na' chsiže' le'e puerten'. Note'tezle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'. ²¹ Na' note'tezle še soele bi cuejyichjle xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna Xan' nach chi'lena'ne' chnabia'to' txen. ²² Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

4

Ben' že' yaban' chesonxene' Diosen'

¹ Beyož bzoja' da' ca' gwne' neda', ble'edaogüeda' nyaljo to puert yaban'. Nach da' yoble benda'

gwne Jesucristw ben' gwne neda' da' nechw
zižjehgua cacze zižje chbež to trompeta, gože'nda':

—Gwyep gan' zoa' nga cont gwlo'eda' le' da' ca'
za' gac.

² Nach la' bente Spiritw che Diosen' cont
ble'edaogüeda' yaban' gan' chi' Diosen' chnabi'e.

³ Na' ble'eda' ben' chi' chnabian' chactite' ca chactit
yejese, yej da' nzi' jaspe na' da' nzi' cornalina.
Na' to da' nac ca to pita' gwyečhjen gan' chi'e
chnabi'en, na' chactiten ca chactit to yej da'
nzi' esmeralda.

⁴ Na' cue'ej cuit Diosen' gan'
chi'e chnabi'e zjachi' yetapechoa bene' gwlej
Diosen' zjanaque' blao, bene' chesenabi'e txen
len le'. Zjanyaze' lache' šiš na' zjazoa corona
de oro yichj to togaque'. ⁵ Na' gan' chi' Diosen'
chnabi'e chep yes na' chac sšag na' chašjw chtin.
Na' lagüen' nita' gaže yi' da' čala'nin. Yi' ca' gaže
zjanaquen Spiritw che Diosen', na' Spiritw che
Diosen' naquen ca gaže spiritw. ⁶ Na' doxen lagüe'
gan' chi'e chnabi'en nžiljw lo yon' to da' chactit ca
vidrw na' nlan' ca to nis nyadi da' nla'xeje.

Na' nita' yetap bene' gan' zoa Diosen'. Tgüje'
nita' cuite' chop la'ate, yetoe' cože' na' yetoe' lagüe',
na' zjažia da' zan yejlaogaque', žia da' žia laogaque'
na' lente cože'gaque'. ⁷ Bene' nechw naque' ca
to león, na' bene' gwchope ca to go'n, na' bene'
gwyone nac cho'alagüe' ca che benach, na' bene'
gwdape naque' ca to bsia be ze lo be'. ⁸ Na' dapte
bene' ca' to toe' žia xop güjeje xilgaque', na' zjažia
zan yejlaogaque' lo xilen' lente cože' xilen'. Na' do
ža do yel bi chososane' chesene':

Leca bene' laždao' xilaže' juisyw nac Xancho
Diosen' ben' nape la'zelagüe' yela' guac xen.

Ba zoacze' cate' za' xe yežlion', na' soacze' toli tocanē.

⁹ Na' yogo' ni'a cate' bene' ca' tap cheso'e diža' catec bene' zaca' nac Dios ben' chi' chnabia', ben' zoacze toli tocanē, yogo' ni'a cate' chesonxene' le' cheso'e yela' choxclen che', ¹⁰ bene' tapechoa ca' gwlej Diosen' cont zjanaque' blao chosozoa xibe' lao Dios ben' zoa toli tocanē chesonxene' le' gan' chi'e chnabi'e na' chosonite' corona chegaquen' xni'en, chesene':

¹¹ Xanto' Dios, zaco' gonxento' le',
na' soato' le' bala'an na' güe'to' diža' che yela' guac
xen chion',
le len' beno' yogo'lol da' de,
na' beno' yogo'lolen con ca gwnalažo'.

5

*Jesucristw ben' zaca'lebe ca xila' daon' gosot
bene' Israel ca' neche xtol'a'gaque'*

¹ Na' ble'eda' Dios ben' chi' chnabia', len ne'e licha noxe' to yiš da' ndobyoyen na' nyoj chop la'aten na' nyeyjon nyišen' gaže seyw. ² Na' ble'eda' to angl gual gwne' zižje gwne':

—¿Non' zaca' gwzoxj seyw ca' cont šaš yišen'?

³ Na' nono bžel bene' zaca' gwzaše' yišen' neca yaban' na' ne yežlion' na' neca gan' že' bene' guat ca'. Ne to nono bžel bene' la'ch le'ezden' nac naquen. ⁴ Na' gwchežchgua' da' nono zoa bene' zaca' gwzaše' yišen' gwlaben' na' neca zaque' na'ze' nac naquen. ⁵ Nach to bene' gwlej Diosen' cont naque' blao gože'nda':

—Bitw cuežo'. Gwna'šč, na' zoa Jesucristw ben' golje lo diaža che da' Judá, naque' rey can' nac da'

xoxxta'ogüe' David, na' da' nape' yela' chnabia' xen zaca'lebde' ca to bež be nzi' león. Na' le' zaque' gwzoxje' seyw ca' gaže na' gwzaše' yišen', le ba gwzoede' bene' cont gac nitlao xtoła' benačen'.

⁶ Nach ble'eda'ne' zeche' gan' chi' ben' chnabian' na' ladjo bene' ca' tap ben' zjažia xil, do gachol bene' blao ca' tapechoa. Ble'eda'ne' ca to xila' dao' ben' ba gosote', ca xila' be žia gaže lozba' na' gaže yejlaoba'. Na' yejlaoban' gaže zejen zoa Spiritw che Diosen' doxen lo yežlion' chonen can' ža Diosen'. ⁷ Nach ben' ble'eda' ca to xila' dao' jaxi'e yiš dan' noxe' ben' len ne'e licha gan' chi'e chnabi'en. ⁸ Na' cate' jaxi'e yišen' bene' ca' tap lente bene' blao ca' tapechoa bosozoa xibgaque' lagüen'. Na' to to bene' blao ca' zjanoxe' to arpa na' to barser de oro gan' chey yal, na' yalen' zejen xtiža' bene' ca' zjanac lo na' Diosen', dižan' chesoe'lene' le' caten' chosol güiže'ne'. ⁹ Nach bene' ca' gosole' to da' cobe dan' ža:

Zaco' jaxi'o yišen' cont gwzašon' na' gwzoxjo' seyw ca' nyišen',

le bnežjw cuino' gosote' le'.

Blalj xčheni' cont bnitlaguo' xtoła'to',

na' gwxi'o neto' cont nacto' lo na' Dios,

neto' nacto' bene' to to nación, to to yež, to to diaža na' chacto' gwde gwdele diža' da' de lo yežlion'.

¹⁰ Na' gwlejo' neto' cont nacto' ca rey,

na' zoato' chonxento' Dios četon' ca bxož,

na' žin ža nabia'to' lo yežlion'.

¹¹ Nach gwna'a na' ble'eda' bene' zan juisyw angl, neca gwzoeda' gwlabane'. Zjazecha angl ca' cue'ej cuit ben' chi' chnabian' na' gan' že' bene'

ca' tap na' bene' blao ca' tapechoa. ¹² Na' benda' cheso'e dižan' zižje chesene':

Jesucriston' bnežjw cuine' neche xtolā' benachen',
na' da'nan' zaca'lebde' ca xila' daon' gosot bene'

Israel cont gwnitlao xtolā'gaque'.

Na' Jesucriston' zaca'cze' gonxenchone',
le chnabi'e doxen, na' yo'o lo ne'e yogo'te da' zjade.
Naque' bene' sina' gual, na' nape' yelā' guac xen.
Cheyalā' güe'chone' yelā' bala'an,
na' güe'cho diža' naque' bene' zaca' juisyw.

¹³ Na' lecze benda' yogo' bene' že' yaban' na' yežlion' na' bene' že' latje che bene' guat, na' bene' zjanita' lo nisdao', cheso'e diža' chesene':

Toli tocanē chonxencho Dios ben' chi' chnabia'
na' Jesucriston' ben' zaca'lebde' ca xila' daon' gosot
bene' Israel cont gwnitlao xtolā'gaque'.

Zjanape' yelā' bala'an, na' zjanaque' bene' zaca' juisyw,

na' zjanape' yelā' guac xen juisyw toli tocanē.

Na' benda' lecze can' gosena be chaš yežlion' na' be chaš le'e yaban' na' lo' nis, na' len yogo' bichle da' zjade.

¹⁴ Nach bene' ca' tap ben' zjažia xil gosene':
—Ca'šcacze gac.

Na' bene' blao ca' tapechoa bosozoa xibgaque' gosonxene' Dios ben' zoa toli tocanē.

6

Seyw ca' gaže

¹ Ca nac seyw ca' gaže, ble'eda' cate' ben' zaca'lebde' ca xila' daon' be gosot bene' gualaž cheto' neche xtolā'gaque' bzoxje' seyw nechon'.

Nach bene' ca' tap zjažia xil, toe' gwne' zižje, ca zižjen' chašjw chtin yi' gwzio', gwne':

—Da, na' gwna' da' nga.

² Na' cate' gwna'a, ble'eda' to cabayw be šiš na' ben' žie' cože'ban' noxe' to arcw. Ba bosozoe' to corona yichje' neche da' ba bene' gan lo gwdile, na' na'a ba zeje' da' yoble cont tillene' nochle bene' chesegue'ede' le' na' gone' gan legaque'.

³ Na' ben' zaca'lebde' ca xila' dao' be gosot bene' gualaž cheto' neche xtoła'gaque', cate' bzoxje' seyww gwchope benda' gwne yeto ben' žia xil, ben' nac bene' gwchope, gwne':

—Da, na' gwna' da' nga.

⁴ Nach bchoj yeto cabayw, na' bena' nacha' be xna. Na' ben' žie' cože'ban' gwyo'o lo ne'e gone' cont bene' že' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

⁵ Na' cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzoxje' seyww gwyone, benda' gwne bene' gwyone ben' žia xil, gwne':

—Da, na' gwna' da' nga.

Nach gwna'a na' ble'eda' to cabayw gasj na' ben' žie' cože'ban' noxe' to xigonz. ⁶ Na' benda' gwne to bene' do gan' že' bene' ca' tap ben' zjažia xil, gože' ben' žia cože' cabayw gasja', gwne':

—Gwyej jažiai' trigw na' cebada cont yesaquen gwbin na' cont chop ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiayi' set na' vino.

⁷ Na' cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzoxje' seyww

gwdape, benda' gwne beñe' gwdape ben' žia xil,
gwne':

—Da, na' gwña' da' nga.

⁸ Nach gwña'a na' ble'eda' to cabayw be gaše, na' ben' žie' cože'ban' lie' Yela' Got. Na' yeto beñe' zej cože', lie' Latje Gan' Že' Beñe' Guat. Na' gosac lo na'gaque' bosoxie' gwdile gan' gosat beñe' zan, na' gosone' cont gosat yezane' gwbin, na' gosone' cont yezan beñe' gosate' len yižgüe', na' gosone' cont be znia gosotba' yezane', na' goc ca' lao to tlawc yežlion' dan' gosac lo ne'e.

⁹ Nach cate' ben' zaca'lebde' ca xila' daon' be gosot beñe' gualaž cheto' neche xtoła'gaque' bzojje' seyw gayo', ble'eda' mes gan' beñe' ca' že' yaban' chosozeye' bi dan' chosozeye' cate' chesonxene' Diosen', na' xni'a mesen' ble'eda' beñe' ca' ba gosot yezica'chle beñe' legaue' lagüe dan' bosozenague' xtiža' Diosen' na' lagüe dan' goso'e diža' gosene' chesejnilaže' Jesucriston'. ¹⁰ Na' beñe' guat ca' gosene' zižje gosene':

—Xanto' Dios, le' naco' beñe' laždao' xilaže' juisyw na' zoaczo' chono' con ca' žo'. ¿Batcan' gono' yela' justis che beñe' ca' že' yežlion' ben' gosot neto'? ¿Batcan' gono' cont yesezaca'zi'e da' bosolalje' xchenton'?

¹¹ Nach Diosen' bnežjue' to to beñe' guat ca' tgüeje xagaue' da' šiš da' gosaze'. Na' gože' legaue' yesyezi'laže'che' yeto chop ža šlac yeseza' beñe' cheyala' yesat can' gosate' lagüe da' chesonxene' Criston', beñe' zjanac ca' biše' lježe'.

¹² Nach ben' zaca'lebde' ca xila' daon' be gosot beñe' gualaž cheto' neche xtoła'gaque', cate' bzojje'

seyw gwxope, gw_{na}'a na' leca gwxo'. Na' gw-bižen' beyaquen gasj ca lache' gasj da' chesaz be_{ne}' chesegüine', na' doxen bion' beyaquen x_{na} ca chen. ¹³ Na' beljw ca' beseyinjen besežinten lo yežlion' can' chyinj no yixgüigw da' žia lo xyaguen cate' chechj to be' gual da' chtan len. ¹⁴ Nach le'e yaban' benittecczen ca to no yiš da' chedoblolen. Na' yogo' ya'a ca' na' no yežlio dao' da' ca' zjachi' lo' nisdaon' bosoša' xišnan'. ¹⁵ Nach yogo'lo_l be_{ne}' že' yežlion', yogo' be_{ne}' ca' chesenabia' lo yežlion', yogo' x_{an} soldadw, yogo' be_{ne}' blao be_{ne}' gw_{ni}'a, yogo' be_{ne}' cheson xšin be_{ne}' yoble ca beyixe', na' len yezica'chle be_{ne}', yogo'cze' bosocuaše' cuin-gaque' do xan bloj, do ladjo yej xen da' zjažia lo ya'a ca'. ¹⁶ Na' gosene':

—Chešca b_{din}j na' yej quinga na' ya'a quinga yesebixen yeseyenen chio' cont bi le'e Diosen' chio', Dios ben' chi' chnabia', na' yeseyenen chio' cont Jesucriston' ben' zaca'lebde' ca xila' daon' be gosot be_{ne}' neche xtolā'gaque' bi gone' saca'zi'cho. ¹⁷ Le ba bžin ža gac juisyw, na' Diosen' len Jesu-criston' leca cheseže'e chio' bi chonxencho legaque', na' nono soe da' yesone' saca'zi'cho.

7

Be_{ne}' Israel ca' be_{ne}' zjanyiše' seyw che Diosen'

¹ Gwdena' ble'eda' tap angl zjazeche' tap squin che yežlion' bosozague' ben' cont bi gwyechjen lo yežlion', lo nisdaon' o gan' ze yag ca'. ² Na' ble'eda' yeto angl be_{ne}' za' gan' chla' gwbiž na' noxe' to da' gwchine' gwchiše'de' seyw che Dios loxga be_{ne}' ca' chesonxen le', Dios be_{ne}' zoa toli toca_{ne}. Na'

anglen' gwne' zižje bol güiže' angl ca' tap ben' zjanac lo ne'e yesone' gac yela' zi' lo yežlion' len lo nesdaon'. ³ Gože' legaue':

—Bi gwžiai'le yežlion', ne nesdaon', ne yag ca' šlac bina' gwchiša' seyww che Dios checho loxga bene' ca' chesonxen le'.

⁴ Na' benda' gwne' bal bene' bchiše' seyon' bene' za'ac lo yogo' diaža che bene' Israel, na' yogüe' gosac to gayoa tapeyon mile'. ⁵ Šižinw mile' za'aque' lo diaža che da' Judá, šižinw mile' lo diaža che da' Rubén, šižinw mile' lo diaža che da' Gad, ⁶ na' šižinw mile' lo diaža che da' Aser, šižinw mile' lo diaža che da' Neftalí, šižinw mile' lo diaža che da' Manasés, ⁷ na' šižinw mile' lo diaža che da' Simeón, šižinw mile' lo diaža che da' Leví, šižinw mile' lo diaža che da' Isacar, ⁸ šižinw mile' lo diaža che da' Zabulón, šižinw mile' lo diaža che da' José na' šižinw mile' lo diaža che da' Benjamín.

Bene' zan zjanyaze' lache' šiš

⁹ Na' gwdena' gwna'a da' yoble na' ble'eda' zjaze bene' zan lao Diosen' gan' chi'e chnabi'e na' lao ben' zaca'lebde' ca xila' daon' be gosot bene' Israel neche xtoła'gaue'. Na' nono goc yosolab bal bene' že', le gosaque' bene' zan juisyw, bene' to to nación, to to yež, to to diaža, na' gosaque' bene' chesac gwde gwdele diža' da' de lo yezlion'. Na' yogüe' zjanyaze' lache' šiš na' zjanoxe' zin. ¹⁰ Na' chesyebede' bososye'e gosene':

Xanto' Dios ben' chi' chnabia' na' Jesucristw ben' zaca'lebde' ca xila' daon' be gosot bene' Israel neche xtoła'gaue',
legaue' ba gosone' yela' mban checho toli tocanē.

¹¹ Nach yogo'lo_l angl ca' zjaze' cue'ej cuite' gan' chi'e chnabi'e, na' be_{ne}' blao ca' tapechoa na' be_{ne}' ca' tap zjažia xil, yogo'lo_{le}' jasechaze' coscho'ale lo yon' gosonxene' Diosen', ¹² gosene':

Chac can' cheya_{la}' gac, Dios che_{to}'.

Zaca'czo' gonxento' le' to_{li} toca_{ne},

le naco' be_{ne}' zaca' juisyw,

naco' la'zelagüe be_{ne}' sina',

zaco' güe'to' yela' choxc_{len} chio' na' güe'to' yela'

bala'an chio' to_{li} toca_{ne},

chnabi'o doxen, na' napo' la'zelagüe yela' guac xen.

Can' nacczen.

¹³ Nach to be_{ne}' blao ben' nac txen len be_{ne}' tapechoa ca' gože'nda':

—¿Nezdo' no zjanac be_{ne}' quinga zjanyaz lache' šiš na' ga za'aque'?

¹⁴ Na' boži'an goša'ne':

—Le' nezdo' be_{ne}' gole, bi nezda' neda'.

Nach gože' neda':

—Be_{ne}' quinga ba gosale'de' da' ba gosac chegaque' yežlion'. Na' ba_{ch} gwnitlao xto_{la}'gaque' na' ba zjanyaze' lache' šiš, le chesejnilaže' Jesucristw ben' blalj xchene' ca xila' dao' be gosot be_{ne}' Israel cont bezi'xen Diosen' xto_{la}'gaque'.

¹⁵ Da'nan' nite' lao Diosen' gan' chi'e chnabi'en chesonxene' le' do ža do yel. Na' Dios ben' chi' chnabi'e zoe' chape' lega_{que}'. ¹⁶ Bich yesebil yesedone', na' gwbižen' bich gwzeyen lega_{que}', ne_{ca} yesacde' zeye'. ¹⁷ Le Jesucristw ben' zaca'lebde' ca xila' daon' ben' gosot be_{ne}' Israel ne_{che} xto_{la}'gaque', len' chgüia chne'e lega_{que}'. Ze'

lao Diosen' gachol gan' chi'e chnabi'e na' gone'

cont nita'chgüe' mbalaz. Gone' cont bich yesebeže' nēca yesegüine'de'.

8

Seyw gažen'

¹ Gwde gože' neda' ca', nach Jesucristw ben' zaca'lebde' ca xila' daon' be gosot beñe' gualaž četon' bzoخة' seyw gaže da' nyiše' yiša', na' cate' bzoخة' goczi yaban' do gašj hor. ² Na' ble'eda' gaže angl ca' zjazeche' lao Diosen', na' bnežjue' legaque' tgüeje trompeta. ³ Na' yeto angl bedeseche' cho'a mes de oro da' zoa lao Diosen' gan' chi'e chnabi'e, mesen' gan' beñe' ca' že' yaban' chosoz-eye' bi da' chosozeye' cate' chesonxene' Diosen'. Na' angla' noxe' to barser de oro gan' yo'o da' zcha'o yal na' bžien' lo yi' ya'alj da' žia lo mesen'. Anglen' bene' ca' cont naquen txen len ši'i beñe' ca' chesonxene' Diosen' bate'teze chosol güiže'ne'. ⁴ Nach gwyas žen che yala' noxe' anglen' gwloen lao Diosen' len xtiža' beñe' ca' chesonxene' le'. ⁵ Nach anglen' gwxi'e ya'alj da' žia lo mesen' gwlo'en lo' barseren' na' bzalen' lo yežlion' na' gošj gwtinchgua, na' goc bichle sšag, gwyep yes na' gwxo'.

Trompeta ca'

⁶ Nach angl ca' gaže ben' zjanoxe' trompeta ca' bosozoan' cho'agaque' cont yosocuežen'.

⁷ Angl nechon' bcuež trompeta čen', na' gwche'chgua yej lo yežlion' na' nčhixen yi' na' čen. Na' da' zcha'o yežlion' gwžiai', yelate'ze ca' goc gašje yo da' de lo yežlion' gwyeyen, lente yag

da' ze lagüen goseyen, na' lecze yeto ca'ate' yixe' ga' da' de lo yežlion' goseyen.

⁸ Nach angl gwchope bcuež trompeta chen', na' to da' nac ca to ya'a xen blažon' lo' nisdaon' čala'ninen. Na' yelate'ze ca goc gašje nisdaon' beyaquen chen. ⁹ Na' yelate'ze ca goc gašje be ca' že' lo' nisdaon' gosatba', na' leze yeto ca'te' barcw ca' čaš lo nisen' gosebiayin'.

¹⁰ Nach angl gwyone bcuež trompeta chen' na' to beljw xen blažon' le'e yaba čala'ninen ca to yi' yech. Jago'onen lo da' zan yegw na' da' zan ga chal nis lo yežlion', yelate'ze ca goc gašje yegw ca' na' ga chal nis dan' zjade yežlion' gan' jago'onenna'. ¹¹ Na' beljon' nzin' Da' Zla', na' nisen' gan' jago'onenna' beyaquen zla' na' bene' zan gosat dan' gose'eje' nisen'.

¹² Nach angl gwdape bcuež trompeta chen' na' yelate'ze ca goc gašje gwbižen' gwžiyain', lecze yeto ca'te' bion' gwžiyain' na' lecze yelate'ze ca goc gašje beljw ca' gosebiayin'. Na' da' ca' gosebiayin' bich bososenin'. Da'nan' gwdena' goc čol yelate'ze ca goc gašj ža gašj yel, na goc ca' yogo' ža yogo' yel.

¹³ Nach gwna'a na' ble'eda' chda lo be' to angl do gachol le'e yaban' na' benda' gwne' zižje, gwne':

—iNyaše'chgua yesac che bene' ca' že' yežlion' yeyož yosocuež angl ca' yešone trompeta čegaquen'!

9

¹ Nach angl bene' gayo' bcuež trompeta chen' na' ble'eda' to beljw da' blažon' le'e yaban' jago'onen lo yežlion'. Na' beljon' goquen ca to bene' na' Diosen' bnežjue'ne' xinya cont saljue' yechw zitjwchgua

dan' nac lo gabil. ² Nach gwsaljue' yechon' na' gwyaschgua žen can' chas žen cate' chesebeque' yi' gual to lo' horn. Na' goc chol le'e yaban' can' chac cate' chi'chgua žendao', lao gwbižen' len lo be' goquen chol catec gwche' žen_{na}'. ³ Gan' gwyas žen_{na}' besežaš biše'zo zan gwyasba' lo yežlion', be yeseyižba' be_{ne}' can' cheson bexjoni' be chaš yežlio. ⁴ Diosen' gože'ba' bibi yesoneba' yixe' ga', ne da' zjanaze' na' ne_{ca} yag ca' ze yežlion', san yeseyižba' be_{ne}' ca' bi nyiše' sey che Diosen' loxgagaque'. ⁵ Na' bi be'e latje yesotba' legaue', san šasba' gayo' bio' yosoči yososaca'ba' be_{ne}' ca'. Na' cate' yeseyižba' be_{ne}', yesežaglagüe' can' chžagla_ocho cate' chyiž bexjonin' chio'. ⁶ Na' cate' žin ža yesomba' ca', be_{ne}' že' yežlion' yesenablaže' yesate', perw bi yesate'; yesaclaže' bich yesenite', perw bi gac can' yesaclažen'.

⁷ Ca nac biše'zo ca', ble'eda' zjanacba' ca cabayw be šja'ac lo gwdile. Yičhgacban' zjazoa da' nac ca corona de oro. Cho'alaoban' naquen ca cho'alao be_nač. ⁸ Zjažiaba' yiša' da' nac ca yiša' yičhj no'ole. Layban' zjanaquen ca lay bež znia be nzi' león. ⁹ Na' zjanyazba' to da' nac de ya da' chcue'ejen cuerp čhegacban'. Na' sšag da' chesomba' len xilgacban' ch_ni_nen ca ch_ni_n cate' chesa'aces cabayw zan zja'acba' lo gwdile zjanxobba' carret. ¹⁰ Na' lo xban biše'zo ca' zjazoa liba' zjanaquen ca xban bexjoni' cont yeseyižba' be_{ne}', na' goc lo na'gacba' yosoči yososaca'ba' be_{ne}' že' yežlion' gayo' bio', yeseyižba' legaue'. ¹¹ Angl ben' beyac da' xigüe' dan' chnabia' gabilen' naquen xan biše'zo ca'. Len_{na}' nzi' Abadón diža' hebreo na' lecze nzin' Apolión diža' griego, na'

zejen diža' Da' Chžiyin'.

¹² Ba gwde yela' zi' nechon' na' za' za'ac yechopen.

¹³ Nach bcuež angl gwxopen' trompeta chen', na' benda' gwne to bene' do gan' zoa mes de oro dan' ze lao Diosen', mes da' žia lozen dapte squin, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'. ¹⁴ Na' bol güiže' angl gwxop ben' noxe' trompetan', gože'ne':

—Besež dap angl ca' ben' besyeyac bene' mal ben' zjanchej cho'a yegw da' nzi' Eufrates.

¹⁵ Nach beseže' angl ca' tap bene' ca' bnita' Diosen' cont yesaše' lo iz, bio', ža na' horen' nžie' bia' yesote' benach, na' caten' gosaše', yelate'ze ca goc gašje bene' že' yežlion' gosote'. ¹⁶ Na' gwnita' chop gayoa millón soldadw chegaque' zjažie' cože' cabayon'.

¹⁷ Quinga ble'edaogüeda' cabayw ca' na' angl ca' bene' besyeyac bene' mal zjažie' cože'gacba' zjanaque' soldadw. Angl ca' zjanyaze' to de ya da' chcue'ej cho'alcho'gaque' na' yana' chnan' ca color che yi' na' chnan' da' azul na' da' gaše. Na' yichj cabayw ca' zjanaquen ca yichj bež znia be nzi' león, na' chchoj yi' cho'agacba' len žen na' len azufre da' chala'nin. ¹⁸ Yelate'ze ca goc gašje bene' že' yežlion' gosat len yi' na' len žen na' len azufre da' bchoj lo cho'agacba'. ¹⁹ Na' bosochin cho'agacba' na' len xbangacba' cont gosotba' benach, na' xbangacban' gosaquen ca bel na' zjansa' yichjen cont goseyi'inen bene'.

²⁰ Na' bene' ca' besyega'an bi gosat cate' gwyas cabayw ca' lo yežlion', legaque' bi besyetinjde' che

da' mal ca' chesone', nēca bososane' da' chesonx-
ene' da' xīgüe' ca' na' l̄ gua'a l̄saca' chēgaque' ca'
da' zjanac de oro, de plata, de bronce, de yej o
de yag, l̄a'czl̄a' l̄ gua'a l̄saca' ca' bi chesele'en, nēca
chesenen, na' nēca chac yesa'aquen. ²¹ Na' nēca
besyetinjde' cont yesebejyichje' bichle da' mal da'
chesone', ca dan' chesote' beñe', da' chesone' txen
len no beñe' guaža', da' chesone' da' yel̄a' zto' len
cuerp chēgaquen', na' da' chesebane' da' de che
beñe'.

10

Angl bene' noxe' yiš dao' ndobyoyen

¹ Nach ble'eda' yeto angl gual gwze'e yaban'
betje' lo yežlion'. To bejw nyechjen le' na' zoa to
pita' yichjen'. Cho'alagüen' chñ'a'titen ca gwbiž,
na' yen̄i'e ca' ble'edan' zjanaquen ca bdope da'
chal̄a'n̄in. ² Anglen' noxe' to yiš dao' da' ba beyašen.
Na' bzoa šl̄a'a n̄i'e lich̄a lo nisdaon' na' yešl̄a'an bzoe'
lo yežlion'. ³ Na' bosye'e zižje ca zižje chosya'a be
nzi' león. Na' cate' bosye'e gwñe gwzio' gaž n̄i'a na'
to to gwzion' zoa da' gosenan. ⁴ Beyož goc ca' na'
ba zoa gwzoja' diža' da' benda' šlac gwñe gwzion'
cate' to beñe' zoa yaba gože'nda':

—Bi gwzojo' dižan' bendo' šlac gwñe gwzion', san
gwdapen lo' yichjlažda'oguo'.

⁵ Nach angl ben' zoa šl̄a'a n̄i'en lo nisdaon' na'
yešl̄a'an lo yežlion' gwl̄is ne'e lich̄an' yabale. ⁶ Na'
gwlo'e da' bal̄i gac can' ža Dios ben' zoa toli tocanē,
ben' ben le'e yaba len yogo'te da' chle'echo le'enñ̄a',
bene' yežlion', beñach, beyixe', na' bite'tezechle da'
de lo yežlion', na' bene' nisdaon' len be ca' na' da'
ca' že' lo'enñ̄a'. Gwne':

—Bich cuez Diosen' gone' can' ba nžie' bia' gone'.
 7 San cate' žin ža gwcuež angl gažen' trompeta
 čhen', cana'ch gac da' nžia Diosen' bia' gac, can' ba
 gože' beņe' ca' goso'e xtižen', da' nono gwņeze cani'.

8 Nach da' yoble ben' zoa yaban' ben' ba
 benczeda' gwņie' neda', gwne':

—Gwyvej jaxi' yiš dao' dan' ba beyaš dan' noxe'
 angl ben' zecha zoa šla'a ni'en lo nisdaon' na'
 yešla'an lo yežlion'.

9 Da'nan' gwy'a gan' zoa anglen' janaba' yišen'.
 Na' anglen' gože'nda':

—Bexon' gwdagon'. Lo' cho'on gadcon' zix ca
 šina' beser, perw lo' li'on yeyaquen zla'.

10 Nach bexoa' yišen' noxe' anglen' gwdaguan'.
 Na' lo' cho'an goquen zix ca šina' beser, perw cate'
 bedaguan' beyaquen zla' lo' li'an. 11 Nach anglen'
 gože' neda':

—Da' yoble cheyala' go'o xtiža' Diosen' na' nao'
 can' gac che zan yež, che zan nación, che beņe'
 chesac gwde gwdele diža' da' de yežlion', na' che
 zan beņe' gwnabia'.

11

Chope beņe' goso'e xtiža' Diosen'

1 Nach anglen' beņe' neda' to ya ca nac da'
 chosochine' cate' chosochixe' yo'o, na' gože'nda':

—Gwyvej jachixe yodao' blao na' mes gan'
 chosozeye' bi da' chosozeye' cate' chesonxene'
 Diosen', na' gwlabo' ba beņe' že' chesonxene' le'.

2 Perw bi gwchixo' chyo'on, le ba naquen lo na'
 beņe' bi zjanac beņe' Israel beņe' bi chesejnlaže'
 Diosen' cont yesone' nacteze chesaclaže' lo ciuda

che Dios lao chopeyon bio'. ³ Na' sela' chope bene' yeso'e xtiža', na' yesaze' lache' gasj ca to bene' chegüine' na' yeseyixjue'ede' xtižan' lao to mil chop gayoa gayon ža.

⁴ Bene' ca' chope zjazaca'lebe' ca yag olivos ca' chope na' ca candler ca' chope da' zjazoa lao Diosen' ben' nac Xan yežlio. ⁵ Na' še no chaclaže' gonxi'e legaque', choj yi' cho'a bene' ca' yeso'e xtižan' na' gwzeyen bene' chgue'ede' legaque'. Can' gac yesat note'teze bene' chende' gonxi'e bene' ca' chope. ⁶ Na' bene' ca' yeseyixjue'ede' xtižan', gac lo na'gaque' yesone' cont bi gac yejw šlac yeso'e xtižan', na' gac lo na'gaque' yesone' cont nisen' yeyaquen chen, na' bate'teze yesaclaže', yesone' gac bite'tezechle da' yesežaglaō bene' že' yežlion'. ⁷ Perw cate' yeyož yeso'e xtižan', nach choj lo' gabil gan' nac yechw zitjwchgua to bež xigüe' nizba' legaque' na' gotteba' legaque'. ⁸ Na' bene' ca' že'na' yosyocua'ane' cuerp chegaquen' gan' chesetolen la cay che ciuda blaon' gan' gosote' Xancho Jesucriston'. Ciudan' zaca'leben ca ciuda Sodoma na' ca nación Egipto. ⁹ Na' šone ža yo gašje bene' za'ac zan yež na' zan nación, bene' zjanac zan diaža, bene' chesac gwde gwdele diža' da' de lo yežlion', yesene'e bene' guat ca' na' bi yeso'e latje yesegaše'. ¹⁰ Bene' ca' že' yežlion' yesyebede' da' gosat bene' ca' chope, na' yosonežjo lježe' bi da' yosonežjo lježe' da' chesyebede' dan' bich nita' bene' ca' yeso'e xtiža' Diosen' len legaque', le leca zed chesacden'. ¹¹ Na' ble'edaogüeda' gwde šone ža yogašje Diosen' bosbane' bene' ca' chope na' gosezeche' da' yoble. Na' yogo' bene' besele'e legaque' besežebchgüe'. ¹² Nach bene' ca' gosoe'

xtiža' Diosen' gosende' gož Diosen' legaue' zižje:

—Le yeda, le yeyep nga.

Nach bene' ca' chesegue'e legaue' besele'ede' besyeyepe' yaban' to lo' bejw. ¹³ Šlac chesyeyepen' leca gwxo' na' gwžiai' late' ciudan', na' gaže mil bene' gosat caten' gwxon'. Na' bene' ca' besyega'an besežebchgüe' na' gosonxene' Dios ben' zoa yaba.

¹⁴ Ba gwde yela' zi' gwchopen' na' za' gac da' gwyone.

Can' goc cate' angl gaže bcueže' trompeta chen'

¹⁵ Nach angl bene' gažen' bcuež trompeta chen' na' benda' bał bene' ca' že' yaban' gosene' zižje, gosene':

Doxen yela' chnabia' che yežlion'

bač naquen lo na' Xancho Diosen' na' lo na' Cristo ben' gwleje' cont chnabi'e.

Na' Diosen' zoacze' chnabi'e toli tocanē.

¹⁶ Nach bene' blao ca' tapechoa ben' zjachi' cue'ej cuit Diosen', jasechaze' coscho'ale lo yon' gosonxene' Diosen', ¹⁷ gosene':

Chonto' yela' choxclen chio' Xanto',

le naco' Dios ben' nap yela' guac xen.

Ba zoaczo' cate' biṇa' xe yežlion',

na' soaczo' toli tocanē.

Na' ba gwzolao chnabi'o len yela' guac xen chion' cont gac can' chazlažo' doxen.

¹⁸ Bene' nación ca' že' yežlion' beseže'e le',

perw ba bžin ža gono' yesezaca'zi'e.

Ba bžin ža choglaguo' che yogo' bene' ca' ba gosat še noe' nap doła'.

Na' gono' cont bene' güen xšino' ca' bene' ca' goso'e xtižon' yesenite' mbalaz,

len yogo' bene' gwlejo' cont zjanaque' lo nao', bene' gosonxen le'.

Con yogo' bene' gosonxen le' yesenite' mba, bene' gole len bene' xcuide'.

Lecze ba bžin ža yesebiayi' bene' ca' bosožiayi' ljež benache' yežlion'.

¹⁹ Nach byaljo gan' chesonxene' Diosen' yaban' na' ble'eda' caj gan' že' yej ca' gan' nyoj da' ca' gož Diosen' bene' Israel gualaż cheto' ca' yesone' cont gaclene' legaue'. Na' šlac gwna'a, gwyep yes, gocchgua sšag, gošj gwtin, gwxo' na' gwche'chgua yej.

12

No'olen' na' bel be zoa gaž yichj

¹ Na' ble'edaogüeda' to da' yebanchgüecho le'e yaban', ble'eda' to no'ole na' nyaze' gwbižen' ca xe'. Nleje' lo bion' na' zoa to corona yichje' da' žian šižinw beljw. ² No'olen' no'e bdao' na' chosye'e, le chaque' bes che yela' sanŋa'. ³ Na' ble'eda' yeto da' zaca' yebanecho le'e yaban', ble'eda' Satanás dan' chnabia' da' xigüe' ca', ba naquen ca to bel be žia gaž yichj, be xen juisyw. Nacha' be xna na' žia ši lozba' na' zoa tgüeye corona to to yichjban'. ⁴ Na' bta xbamban' cont bchinjen zan beljw ca' žia le'e yaban' na' beselažon' lo yežlion', yelate'ze ca goc gašje beljw ca' zjažia le'e yaban' bchinj xbanban'. Na' gwlezba' xni'a no'olen' ba zoa sanŋa' cont yebba' bdao' chen' cate' sane'be'. ⁵ Nach no'olna' gwxane' to bi' byo bi' nabia' nación ca' na' žan ca žan yosozenague' chebe'. Nach Diosen' beyo'ebe' gan' chi'e chnabi'e. ⁶ Nach no'olen' boxonjde' belen',

na' gwyeye' to latje daš da' benšagüe' Diosen' che', gan' yeso'ene' da' ye'ej gagüe' lao to mil chop gayoa gayon ža.

⁷ Gwde na' goc to gwdile yaban', le angl blao ben' le' Miguel na' soldadw che' ca' gosedillene' bel ben' žia gaž yichj lencze angl che belen' bene' ca' besyeyac da' xigüe'. ⁸ Na' belen' len da' xigüe' ca' bi gosezoen angl ben' zjanac bene' che Dios, na' bich bi latje gota' che belen' yaba, neca che da' xigüe' ca' zjanac leba' txen. ⁹ Angl che Diosen' bosozale'ba' lo yežlion'. Na' lecze bosozale' da' xigüe' ca' lo yežlion'. Belnan' ben' zoa ža gwlaste nacha' gwxiye' na' leba' Satanás, na' ne' zoaczba' na'a chziye'ba' yogo' beňach.

¹⁰ Nach benda' to bene' zoa yaban' gwne' zižje gwne':

—Bač bžin ža ben Dios chechon' cont bene' ca' chesejnilaže'ne' zjanite' len le'. Bač bžin ža nachia' Dios chechon' nape' yela' guac xen. Ba bžin ža chnabi'e cont gac con da' cheyala'cze gac. Na' ba bžin ža Criston' ben' gwleje' cont nabi'e bač chnabia'lene' le'. Gac da' cheyala'cze gac, le Satanás dan' ba gwzao lao Diosen' do ža do yel bcuišen bene' chesejnilaže' Criston', bač besyebjen'. ¹¹ Na' bene' gosejnilaže' Criston' na' ba gosate', gosezoede' bi bosozenague' che Satanásen', le gosejle'e Jesucriston' blalj xchene' neche xtoła'gaque' na' goso'e diža' chesejnilaže'ne'. Bene' ca' ba gosat gosache'ede' yejni'a yesate' clal ca yesebejyichje' Jesucriston'. ¹² Yaban' cheyala' gosya'an yela' chebe chen, na' le'e že'le gan' zoa Diosen' cheyala' yebele, perw nyaše'chgua gac che le'e zoale lo yežlion' na' lo' nesdaon', le Satanás

dan' chnabia' da' xigüe' ca' ba betjen gan' zoalen' chaclocchguan, le nezen yešložga de latj čhen.

¹³ Nach cate' belen' gocbe'eba' bosozale'ba' lo yežlion', blagsesba' no'olen' gwxan bi' byo daon'.

¹⁴ Perw Diosen' bnežjue' chop xile' da' xen ca xil bsiadao' cont gwyeje' latje daš gan' bi goc žin belen', latje gan' benšagüe' che' gan' yeso'ene' da' ye'ej gagüe' šon iz yo gašje. ¹⁵ Na' bchoj nis zil cho'a belen' goquen to yegw cont bžinen gan' zoa no'olen' na' guan' le'. ¹⁶ Perw Diosen' bene' cont yežlion' goclenen no'olen', byaljon güe'ejen nis dan' bchoj cho'a belen'. ¹⁷ Nach belen' blocchguaba' no'olen' na' gwyejba' jatillemba' yezica'chle xi'ine' da' chosozenague' che Diosen', chesone' con da' že' na' zjanita'čache' chesejnilaže' xtiža' Jesu-criston'.

13

Čhope bež xigüe' be ble'e Juan

¹ Na' gwzia' cho'a nisaon' na' ble'eda' bchoj to bež xigüe' lo' nisaon'. Bežen' nita' gaž yichjba' na' žia ši lozba' na' žia tgüeje corona lao to to lozban'. Na' to to yichjban' nyoj to laba' da' chlo'en chon cuimba' ca Dios. ² Ble'eda' bežen' nacba' ca to tigr, perw ni'ana'ban' zjanaquen ca ni'a na' oso na' cho'aban' naquen ca cho'a león. Nach bel ben' žia gaž yichj bnežjwba' bežen' yela' guac na' yela' chnabia' cheban' cont gwnabia'ba' na' cont gosenita' benač bosozenague' cheba'. ³ Ble'eda' to yichj bežen' nacchguan güe', ca to da' gatlemba', perw beyacba'. Na' yogo'lol benač besyebande' dan' beyacban' na' bosozenague' cheba'. ⁴ Yogo'ze

be_{ne}' gosonxene' belen' dan' bembā' cont gwn-
abia' bež xigüen', na' lecze gosonxene' bež xigüen',
gosene':

—Nono zoa be_{ne}' nap yela' chnabia' xen ca bež
nga, na' nono zoa be_{ne}' soede' tillene'ba'.

⁵ Leczē nono bžon gwna bežen' zaca'chba' ca
Dios, na' gwnaba' yela' ya' che Diosen'. Na' goc
lo na' bežen' gwnabia'ba' chopeyon bio'. ⁶ Na'
gwnechguaba' yela' ya' che Diosen' na' che yaba
gan' zoe' na' len che yezica'chle be_{ne}' ca' že' ya-
ban'. ⁷ Na' gwyo'o lo na' bežen' gwdillemba' be_{ne}'
ca' gosejnilaže' Diosen' na' bi gosezoede'ba'. Bibi
goc yesone' cont yesyechoje' lo na'ba'. Gwn-
abia'ba' yogo' nación, yogo' yež, yogo' diaža na'
be_{ne}' chesac gwde gwdele diža' da' de lo yežlion'.
⁸ Na' yogo' be_{ne}' že' yežlion' be_{ne}' bi zjanyoj la-
gaque' le'e libr che Jesucriston', gosonxene' bežen'.
Le cate' gwxete yežlion' Jesucriston' bzoje' le'e
libr che' la yogo' be_{ne}' nezde' gata' yela' mban
chegaque' toli tocaṇe, Jesucristw ben' zaca'lebde'
ca xila' dao' be gosot be_{ne}' gualaž cheto' neche
xtola'gaque'.

⁹ Note'tez le'e žia nagle da' chene, le gwzenag
da' nga nia' le'e. ¹⁰ Be_{ne}' yeseyixjue' ljež be_{nache}'
ližya, decze de ližya yesata' legaue'. Na' be_{ne}' yesot
ljež be_{nache}' len spada, decze de gac chegaque'
ca'. Da'nan' chonen byen soaṇhaṇ chio' ba gwlej
Diosen' cont naccho lo ne'e, gwyo gwchejcho len bi
da' gac checho na' soaṇhaṇcho šejnilaže'chone'.

¹¹ Gwdena' ble'eda' yeto bež xigüen' be bchoj lo'
yo. Na' žia chop lozba' da' nac ca loz xila', perw
be'ba' diža' can' choe' bel ben' žia gaž yichjen'

diža'. ¹² Na' bež nechon' bembā' cont bež gwchopen' gwnabia'ba' par leba' na' bež gwchopen' bembā' cont yogo' beñe' že' yežlion' gosonxene' bež nechon' ben' beyaque len güe' dan' naquen ze da' got leba'. ¹³ Na' bež gwchopen' bembā' zan da' bebanchgüe beñe' len yela' guac cheban', na' bembā' cont besele'ede' yi' le'e yaban' na' bese-lažon' lo yežlion'. ¹⁴ Na' da' bembā' da' ca' gan' zoa bež nechon', gwziye'ba' beñe' že' yežlion' cont bosozenague' cheba'. Nach bembā' mandadw gosone' to l gua'a lsaca' da' nac ca bež nechon' da' gosonxene', bež ben' goc yichjban' güe' len spada, güe' da' naquen ze da' got leba' perw beyacba'. ¹⁵ Na' goc lo na' bež gwchopen' bembā' cont l gua'a lsacan' gwyo'on biš grasyw. Na' goc gwñen, benen mandadw gosote' yogo' beñe' bi gosonx-enen'. ¹⁶ Na' bež gwchopen' lecze bembā' byen gosezoa yogo' beñe' señw che bežen' le'e na'gaque' licha o loxgagaque', beñe' gole len bi' bixjw, na' beñe' gwñi'a len beñe' yaše', na' beñe' cheson xšin beñe' yoble ca beyixe' len yezica'chle beñe'. ¹⁷ Na' note'teze beñe' še bi zoe' señw che bežen' o laba' o número da' zejen laba', bi goc bi si'e nēca goc bi gote'. ¹⁸ Chyažjecho yela' sina' cont šejni'icho da' nga. Beñe' chejni'i guac gwlabē' número cheban', le naquen número da' chchin beñach, na' número cheban' naquen xop gayoa gayon xop.

14

Da' gosol beñe' ca' to gayoa tapeyon mil gosonx-ene' Diosen'

¹ Na' gwñā'a na' ble'eda' Jesucristw ben' zaca'lebde' ca xila' dao' be gosot beñe' gualaž

četo' neche xtolā'gaquen', zeche' lo ya'a Sión len to gayoa tapeyon mil beñe' yoble. Na' zjanyoj la Jesucriston' len la Xe' Diosen' loxgagaque'.² Na' benda' chesol beñe' zan beñe' že' yaban'. Nenen ca chsiž ga zjadechgua yegw zan na' ca nen cate' chašjw chtin. Na' nenen ca nen cate' beñe' zan chosogole' arpan' to ši'ize. ³ Na' gosole' to da' cobe lao Diosen' na' lao beñe' ca' tap zjažia xil na' lao beñe' blao ca' tapechoa gan' chi' Diosen' chnabi'e. Noch no beñe' yoble goc gol len, con beñe' ca' to gayoa tapeyon mil na'ze gosac bososede' dan' gosolen' cont gosonxene' Diosen', legacze' bebej Criston' lo na' Satanásen' šlac ne' nite' yežlion'. ⁴ Beñe' ca' gosolen' zjanaque' beñe' bi gosata'lene' no'ol bi nac xo'olgaque', na' gosapchgua cuingaque' cont gosac lažda'ogaquen' xilaže' len Diosen'. Na' zja'acteze' len Jesucriston' gate'teze zeje' chosozenague' che', le bebeje' legaque' lo na' Satanásen' cont zjanaque' lo ne'e na' lo na' Diosen'. Da'nan' zjazaca'lebde' ca to tlacw coseš da' bnežjw beñe' Israel gualaž četo' ca' lo na' Diosen'. ⁵ Gwbat goso'e diža' güenlaže' na' bibi dolā' zjanape' lao Diosen' ben' chi'e chnabi'e.

Da' gosena šone angl

⁶ Nach ble'eda' yeto angl le'e yaban' chde' lo be'. Na' gwdixjue'ede' diža' güen che Diosen' da' bi te čhen len beñe' že' yežlion', len beñe' zjanac to to nación, to to yež, to to diaža, na' beñe' chesac gwde gwdele diža' da' de yežlion'. ⁷ Gwne' zižje gože' legaque':

—Le žeb Diosen' na' le gonxene', le ba bžin hor gone' yela' justis che beṇaḥ. Le gonxen Dios ben' ben yaban', yežlion', nisdao' na' ga chal nis.

⁸ Yeto angl za' cožen' gwne':

—Baḥ bžin ža cuiayi' ciuda Babilonia da' nac da' blao. Baḥ bžin ža cuiayi' ciuda che beṇe' ca' bosozoe' Diosen' ca'ale na' gosebede' da' nac yela' zto', le ba gosego'oyele' beṇe' že' yogo' nación cont chesone' güedenag len Diosen'.

⁹ Nach yeto angl zej cože' beṇe' gwchopa' be'e diža' zižje gwne':

—Note'teze beṇe' chesonxen bež xigüen' len l gua'a lsaca' cheba' na' cheso'e latje chesezoa señw che beža' loxgagaque' o taca'gaque', ¹⁰ Diosen' ba nžie' bia' yesesaca'zi'chgua beṇe' ca'. Yesezaca'zi'e gan' čala' yi' len azufre lao angl che Diosen' na' lao ben' zaca'lebde' ca xila' dao' ben' gosot beṇe' Israel neche xtoła'gaque'. ¹¹ Toli tocaṇe chas žen che yi' gan' yesezaca'zi'en. Na' beṇe' ca' chesonxen bežen' len l gua'a lsaca' cheban', na' beṇe' zjazoa señw che bežen' loxgagaque' o taca'gaque', bi gac yesyezi'laže' len da' yesezaca'zi'en ne chel ne lagüe ža. ¹² Da'nan' chonen byen soaḥaḥ chio' ba gwlej Diosen' cont naccho lo ne'en, gwyo gwčejcho len bi da' chac checho, chio' chzenagcho che da' non Diosen' mandadw goncho na' bi chbejyichjcho dan' chejnilaže'cho Jesús'en'.

¹³ Nach benda' to beṇe' zoa yaban' gwne':

—Bzoi da' nga: “Mbalaz beṇe' ca' ne' chesejni-laže' Xancho Jesucriston' žinte ža yesate'. Can' chac na'a na' can' gac bate'teze.”

Na' Spiritw che Diosen' žan:

—Da' li nite' mbalaz, le yesyezi'laže' len xšingaquen', na' gachia' yogo' da' güen da' ba gosone'.

Yotob Diosen' be_{ne}' bi chosozenague' che' cont yesezaca'zi'e

¹⁴ Nach gw_{na}'a da' yoble na' ble'eda' to bejw šiš le'e yaban' na' cože' bejon' chi' to be_{ne}' nac ca to be_{nach}. Na' zoa to corona de oro yichjen' na' no_xe' to da' nzi' hoz da' n_lachgua. ¹⁵ Na' yeto angl bchoj lo' gan' chesonxene' Diosen' yaban' na' gw_{ne}' zižje gože' ben' chi' cože' bejon':

—Ba bžin hor yotobo' coseš che uvas dan' de yežlion', le ba golen.

¹⁶ Nach ben' chi' cože' bejon' no_xe' hoz botobe' cosešen'.

¹⁷ Nach bezchoj yeto angl lo' gan' chesonxene' Diosen' yaban' na' le_cze no_xe' yeto hoz da' n_lachgua.

¹⁸ Na' le_cze bezchoj yetoe' ben' yo'o lo' ne'e yi' da' cha_{la}' lo' mes gan' chesonxene' Diosen'. Na' angl nga gw_{ne}' zižje bo_l güiže' angl gwchopa' ben' le_cze no_xe' hoz, gože'ne':

—Ba güe uvas da' žia lo' yežlion'. Bečoguen len hoz chion' dan' n_lachgua cont yotobchon.

¹⁹ Nach anglen' bečogue' uvas da' žia yežlion' len hoz dan' no_xen' na' botoben' bzalen' to lo' ša' xen ga yesesiē' cont choj xisen'. Zeje diža', Diosen' botobe' be_{ne}' ca' bi bosozenag che' na' gwlo'e lega_{que}' ga yesezaca'zi'e. ²⁰ Na' gan' gosezaca'zi'en naquen cho'a ciudan', na' lo' ša' xen gan' gwlo'e uvasen' belalje chen zil da' nac xchenga_{que}', bežinen ca sibe to xchega' cabayw, na' bžiljon šo_{ne} gayoa mil metr.

15

Angl ca' zjajo'o lo na'gaque' gaže yela' zi' da' zelao yesac

¹ Na' ble'eda' yeto da' leca zaca' yebanecho le'e yaban'. Ble'eda' gaže angl bene' zjanac lo na'gaque' yesone' yegaže yela' zi' cont yeyož gwlo'e Diosen' can' chone' da' chloque' bene' ca' cheson da' xinj.

² Lecze ble'eda' to da' nac ca to nisdao' de vidrw da' nchixen yi'. Na' cho'a nisdan' zjazecha bene' ca' gosezoede' bi gosonxene' bežen' na' l gua'a lsaca' dan' nac ca leba', na' bi goso'e latje yosozoe' legaque' señw cheba' o número da' zejen laba'. Na' zjanoxe' tgüje arpa da' bnežw Diosen' legaque'.

³ Na' ble'eda' legaque' chesonxene' Diosen' chesole' to da' bsede da' Moisésen' bene' Israel gualaž cheto' ca', Moisés ben' ben xšin Diosen' cani'. Lecze chesole' da' naquen to da' bsede Jesucriston' legaque', Jesucristw ben' zaca'lebde' ca xila' dao' be gosot bene' gualaž cheto' neche xtola'gaque'.

Quinga žan:

Xanto' Dios, yogo' da' ba beno' len yela' guac xen chio'

naquen da' güen juisyw na' da' zaca' yebanecho.

Yogo' da' chono' zejen to licha na' naquen da' zaca'.

Len' chnabi'o nación ca'.

⁴ Nono zoa bene' bi cheyala' žebe' le' Xanto', da' chono' castigw che da' malen'.

Nono zoa bene' bi cheyala' gonxene' le'.

Tozo' le' naco' bene' laždao' xilaže' juisyw.

Na' bene' že' yogo' nación yeside' laguon' yesonxene' le',

le ba besele'ede' da' ba beno' na' zjanezde' zejcen to licha.

⁵ Gwde benda' da'na' nach gwna'a da' yoble na' ble'eda' byaljo gan' chesonxene' Diosen' yaban', latje gan' ngo'ošagüe' ley che Dios da' nyoj. ⁶ Na' ble'eda' gaž angl ca' zjajo'o lo na'gaque' yesone' gac gaž yela' zi' lo yežlion', besechoje' gan' chesonxene' Diosen' yaban'. Angl ca' zjanyaze' lache' šagüe' da' nac šiš xila' da' chactiten, na' to toe' nchej cho'alcho'e to bant de oro. ⁷ Na' ble'eda' beñe' ca' tap zjažia xil ben' nita' lao Diosen', na' toe' bnežjue' angl ca' gažen' tgüeje tas de oro da' zjanža'ten da' zjajožen da' chon cont chac yela' zi' ca' lo yežlion', na' zejen Diosen' ben' zoa toli tocanē chlocchgüe' da' cheson beñe' bi chosozenag che'. ⁸ Na' doxen gan' chesonxene' Diosen' yaban' gwche'chguan ca žen che be'ni' da' nsa' Diosen' na' che yela' guac xen che'. Nono goc šo' gan' chacxen Diosen' šlac biña' yeyož yesac yela' zi' ca' gaž da' zjanac lo na' gaž angl ca'.

16

Tas ca' gaže na' yela' zi' ca' gosac cate' bososcho'en

¹ Na' benda' gwne Diosen' zižjehgua, zoe' gan' chacxene', gože' angl ca' gaže:

—Le šja'ac le šjalalj dan' yože lo' tas chelen' lo yežlion', da' zejen leca chloca' da' xinj cheson beñe' ca' bi chosozenag chia', na' gona' ga yesezaca'zi'chgüe'.

² Nach angl nechon' gwyeje' jalalje' da' yože lo' tas chen' lo yežlion' gan' nac yo biž, na' yogo' beñe' ca' zjazoa señw che bežen' na' chesonxene' l gua'a

lsaca' da' nac ca leba', gosebie' güe' xen güe' zban na' goselachgüe'.

³ Nach angl gwchopen' jalalje' da' yože lo' tas chen' lo nesdaon' na' nesdaon' beyaquen chen ca chen che bene' guat, na' gosat yogo' be ca' že' lo' nisen'.

⁴ Nach angl gwyonen' jalalje' dan' yože lo' tas chen' lo yegw ca' na' gate'ze chal nis na' lecze besyeyaquen chen. ⁵ Nach benda' gwne angl ben' chape' nisen' da' de lo yežlion', gože' Diosen':

—Xanto' Dios, len' naco' bene' laždao' xilaže' juisyw. Ba zoaczo' le' cate' za' xe yežlion'. Zejczto' licha can' ba gwchoglaguo' chac da' quinga, ⁶ le bene' že' yežlion' ba gosote' bene' ca' goso'e xtižon' na' gosote' nochle bene' gosac lo nao'. Da'nan' ba beno' cont yese'eje' chen neche da' bosolalje' xchen bene' ca'. Na' da' chac chegaque' naquen da' cheyala'cze gac.

⁷ Nach benda' gwne to bene' do cho'a mes gan' bene' ca' že' yaban' chosozeye' bi da' chosozeye' cate' chesonxene' Diosen', gwne':

—Xanto' Dios, len' napo' la'zelagüe yela' guac xen, chono' con can' žo' gono', na' chono' da' zej to licha cate' chchogbi'o che bene'.

⁸ Nach angl gwdapen' jalalje' dan' yože lo' tas chen' lo gwbižen', na' gwbižen' bzeyen benach. ⁹ Yogüe' leca goseye', perw bi besyetinjde' xtola'gaque' na' bi gosonxene' Diosen', con gosenē' yela' ya' che Dios ben' be' latje goc da' ca' chesezaca'zi'e.

¹⁰ Nach angl gayon' jalalje' dan' yože lo' tas chen' gan' chi' bežen' chnabia'ba' na' beyac chol

doxen gan' chnabia'ban'. Na' benachen' gosag-wxejte lože'gaquen' catec gosesezaca'zi'e. ¹¹ Na' gosene' yela' ya' che Dios ben' zoa yaban' neche dan' chesezaca'zi'en na' neche güe' xen dan' zjažia lo cuerp chegaquen', perw ne ca' bi besyetenjde' che da' mal dan' gosonen'.

¹² Nach angl gwxopen' jalalje' dan' yože lo' tas chen' lo yegw xen da' nzi' Eufates, na' bebiž nis yegon' cont beyaquen to nez ga yesede bene' gwnabia' ca' za'ac do gan' chla' gwbiž.

¹³ Nach ble'eda' šone da' xigüe' da' zjanac ca blož. Ton bchojen cho'a bel be zoa gaž yichj, yeton bchojen cho'a bež xigüen' na' yeton bchojen cho'a ben' cho'e diža' güenlaže' cont chesonxene' bežen'.

¹⁴ Na' da' xigüe' quinga gosonen yela' guac da' besyebane bene', na' jasetoben yogo' bene' gwnabia' ca' že' gate'teze lo yežlion' cont yesedillene' Dios ben' nap la'zelagüe yela' guac xen cate' žin ža gac ca'. ¹⁵ Na' benda' ben' nac Xi'in Dios gwne':

—Le gwzenag da' nga: ba zoa yida' da' yoble, yedexenyala' bene' bi chosozenag chia' can' chzenyal bene' gwban ga chjalane'. Mbalaz zjazoa note'teze bene' nita'teze' chesebeze' neda' cate' yida' na' chesezaquede' bibi da' mal chesone', le yesacde' zto' še bina' yesyetenjde' xtoła'gaquen' caten' yida', na' yogo'ze bene' yesacbe'ede' da' malen' ba gosonen' še ca'.

¹⁶ Nach bezle'eda' da' xigüe' ca' šone bosyotoben yogo' bene' gwnabia' ca' že' lo' yežlion' to latje ga nzi' Armagedón diža' hebreo.

¹⁷ Na' angl gažen' jalalje' dan' yože lo' tas chen' lo be', na' benda' gwne Diosen' zižje, gan' zoe'

chesonxene' le' yaban' gan' lecze chi'e chnabi'e, gwne':

—Bačh goc da' cheyała' gac.

¹⁸ Nach gwyep yes, goc sšag, na' gošj gwtin, na' leca gwxo'. Gwxo'ch ca ba goc bate'tezechle šlac že' benachen' lo yežlion'. ¹⁹ Na' ciuda da' nac la'zelagüe blao lo yežlion' gwžiyin' bchojen šonle, na' lecze gosebiayi' yezica'chle ciuda da' zjachi' lo yežlion'. Diosen' bich gwleze' bene' cont goseyi gosezaca'chgua bene' že' ciuda Babilonia che da' mal da' ba gosonteque', le blocchgüe' yela' mal čhegaquen'. ²⁰ Na' catequen' gwxo' besyenittecze yogo' yež da' zjachi' lo' nisdan' na' yogo' ya'a ca'. ²¹ Na' gwche'chgua yej ži'a lo yežlion', yej zi'i da' cha'a do tapa rob güeje beselažon' cože' bene'. Na' bene' že' yežlion' gosen'e yela' ya' che Diosen' neče dan' besežaglaochgüe' len yej dan' gwchen'.

17

Diosen' be'e castigw che ciuda blao da' zaca'lebe ca to no'ole zle'

¹ Na' ca nac angl gaž ca' gosoxe' tas de oron', toe' beden'e neda', gože'nda':

—Da, gwlo'eda' le' can' gon Diosen' saca'zi' no'ole blaon' chi' lo nisdan' ca', no'olen' nac no'ol zle'. ² Yogo' bene' gwnabia' ca' že' yežlion' ba besyebede' bosozenague' che' gualaz che Diosen', na' da'nan' guac nacho zjanaque' xtoe'. Na' bene' že' yežlion' da' besyebekhde' le' clal ca Diosen', guac nacho gosezožde' da' ba gose'eje' vino da' bnežjue' legaque'.

3 Nach šlac ben Spiritw che Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xna be nac gaž yichjba' na' žia ši lozba'. Na' doxen cuerp cheban' nyoj diža' da' chžiaba' yela' ya' che Dios. 4 No'olen' nyaze' lache' da' nac moradw na' xna, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zejen chbede' chone' da' yela' zto' na' bichle da' chgue'e Dios. 5 Na' loxgue' nyoj diža' da' žan naquen' naque', diža' da' bi gosejni'i benach, žan: "Naca' ciuda Babilonia na' nacchgua' blao. Naca' no'ole zle', le chona' cont bene' že' yežlion' bi chesonxene' Diosen', na' chgo'oyela' leaque' cont chesone' da' zan da' chgue'e Diosen'." 6 Na' ble'eda' chzože no'olen', le ba güe'eje' xchen bene' ca' zjanac lo na' Diosen', bene' goso'e diža' chesejnilaže' Jesúsen', na' da' nacho güe'eje' xchengaque' zeje diža' betue' zane'. Na' cate' ble'eda' no'olen' leca bebanda'. 7 Nach gož anglen' neda':

—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'. 8 Bežen' ble'edo' gwzoaba' gwnabia'ba' šlož na' bich zoaba' na'a, perw yechojba' lo' yechw zitjwchgua dan' nac lo gabilen' gan' yo'oba' na'a cont soaba' nabia'ba' yežlož, na' techle yeyo'oba' na' saca'zi'ba' toli tocanē. Cate' gwxe yežlion' Diosen' bzoje' la bene' ca' zjanape' yela' mban toli tocanē le'e libr chen'. Na' bene' ca' bi zjanyoj lagaque' le'e libr che Diosen' yesyebande' cate' yesele'ede' bežen' gwzoa, ben' bi zoa na'a perw soaba' da' yoble.

⁹ 'Chyažjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'. ¹⁰ Na' lecze zejen gaž beñe' gwnabia'. Gayoe' ba gosenite' gosenabi'e na' ba gwnit yela' gwnabia' chegaquen'. Toe' chnabi'e na'a na' ben' yeto beñe' bzeben' za' yedenabi'e, na' cate' yide', šložze yedenabi'e. ¹¹ Na' bež ben' gwzoa cana' perw bich zoaba' na'a, zejen yeto beñe' gwnabia', beñe' xono'. Naque' to beñe' ca' gaže gosenabi'e na' nabi'e da' yoble, perw Diosen' gone' cont cuiaye'e na' chi saque' toli tocanē.

¹² 'Na' lozba' ca' ši dan' ble'edo', zejen ši beñe' gwnabia' beñe' za' za'ac cont yesenabi'e. Na' gac lo na'gaque' yesenabi'e txen len bežen', perw šložze. ¹³ Na' yogo'te beñe' ca' ši, toz ca yesone' yesegüe'e lo na' bežen' yela' gwnabia' chegaquen' na' bichle da' chac chesone' cont bežen' gacchba' blao. ¹⁴ Na' yesedillene' Jesucristw ben' zaca'lebde' ca xila' dao' ben' gosot beñe' gualaž cheto' neche xtoła'gaque', na' Jesucriston' gone' gan lo gwdilen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle beñe' gwnabia'. Na' beñe' ca' yeson txen len Jesucriston' zjanaque' beñe' ca' ba gwlej Diosen' cont zjanaque' xi'ine', beñe' ca' nezde' yesenita'chache' yesejnilaže'ne' bite'teze da' gac.

¹⁵ Nach anglen' gože' neda', gwne':

—Nisdao' ca' ble'edo' gan' chi' no'ol zlen' zejen yesenita' beñe' zan juisyw, beñe' yež zan na' nación zan, beñe' chesac gwde gwdele diža' da' de lo yežlion'. ¹⁶ Na' bežen' žia no'olen' cože'ban', ben' žia ši loz, gue'eba' no'olen' na' lecz ca' yeson lozba' ca'

ši dan' zejen ši beṇe' gwnabia'. Na' yesaque' txen yeseque'e da' de che no'olen' na' yosyocua'aṇe'ne' ga'alyide'. Tena' yesagüe' xpelen' na' yosozeze' bi da' yega'aṇ da' bi yesagüe'. ¹⁷ Le Diosen' güe'e latje yesaque' txen yesone' yogo' da' ca' na bežen', na' yesone' yela' chnabia' chegaque' lo na' bežen' cont yeyož gac yogo' dan' ba gwna Diosen'. ¹⁸ Na' no'olen' bač ble'edo', naque' ciuda blaochgua da' chnabian' beṇe' gwnabia' ca' že' doxen lo yežlion'.

18

Can' gac cate' cuiayi' ciuda Babilonian'

¹ Gwdena' ble'eda' yeto angl beṇe' gwza' yaban' betje' lo yežlion'. Goc lo ne'e yela' gwnabia' xen cont goc con can' gwne', na' gwyeni' lo yežlion' len be'ni' che' da' nse'e. ² Na' anglen' gwne' zižje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yogo'cze be zoa xil be chesegue'e beṇač. ³ Cuiayin', le beṇe' ca' že' ciudan' gosego'oyele' beṇe' že' yogo' nación cont bosozoe' Diosen' ca'aṇe bi gosonxene' le'. Na' beṇe' gwnabia' ca' že' yežlion' ba gosonchgüe' da' mal txen len beṇe' Babilonia ca' catequen' besyebede' gosone' da' yela' zto', na' beṇe' güen delgens ca' že' lo yežlion' ba gosaque' beṇe' gwni'a, le beṇe' Babilonia ca' gosonditjchgüede' dan' gota' chegaque' gosezi'en.

⁴ Nach benda' gwne yeto beṇe' zoa yaban', gwne':

—Le'e nacle xi'ina', le yechoj ciuda Babilonian' cont bi gonle da' mal txen len bene' ca' na' cont bi saca'zi'le txen len legaque', ⁵ le dechgua xtoła' bene' Babilonia ca', na' bich cuez Diosen' gwnežjue' castigw chegaque'. ⁶ Yesezaca'zi'sque' lagüe dan' bosochi bososaque' bene', na' yesežaglaošque' da' xench ca dan' bosochi bososaque' bene' yoble. Gacšca chegaque' castigw guallech ca da' gosone' che bene'. ⁷ Con can' gota'chgua da' šagüe' da' güen chegaque' na' gosone' con bi da' žan chegaque', chnablaža' gacchgua chegaque' yela' yaše' yela' zi' cont yesyegüine'chgüede'. Bene' Babilonia ca' ba gosone' xbab lo' yichjlažda'ogaque' gosene': "Gwbat te yela' chnabia' cheton'; gwbat soato' yela' güine', neto' že'to' ciuda blao nga." ⁸ Da'nan' lo toze ža gac yogo' da' ca' gosacde' gwbat gac chegaque'. Bene' zan yesat, bene' zan yesegüine'de', na' yesebil' yesedone', na' yeseye' len yi'. Gac ca' che bene' že' ciuda Babilonian', le Xancho Diosen' nape' yela' guac xen cont gone' yesezaca'zi'e neche xtoła'gaque'.

⁹ Bene' gwnabia' ca' že' lo yežlion' bene' bosozenag che bene' Babilonia ca' cont bosozoe' Diosen' ca'ale na' gosone' bichle da' chgue'e Diosen', legaque' yesebeže' na' yesegüine'de' cate' yesele'ede' žen da' chas cate' šey ciudan'. ¹⁰ Na' yesyega'ane' zito'le yesene'e can' gac che bene' Babilonia ca', le yesežebchgüe'. Na' yesene':

—jNyaše'chgua chac che ciuda Babilonia nga da' nac blaoch ca yogo' ciuda! Ba chbiayi' ciuda da' gwnabia'ch lo yezica'chle ciuda da' zjachi' yežlion'. Ba bžin ža cuiayin' to ši'ize.

¹¹ Nach be_{ne}' güen delgens ca' že' yežliona' yesebeže' na' yesegüine'de' cate' cuiayi' ciudan', le noch no si' dan' yesoten'. ¹² Nono žel be_{ne}' si' da' yesote' da' nac de oro, de plata, de yej zaca', na' de perlas. Nono žel be_{ne}' si' lache' la'ay da' chesote' de lino, de sed, na' lache' moradw na' lache' x_{na}. Nono žel be_{ne}' si' da' yesote' da' nac de yag da' ch_{la}' zix o de bichle yag zaque', de marfil, de ya na' de mármol. ¹³ Nono žel be_{ne}' si' canel, no set zix, no yal, no mirra, no perfume, no vino, no set yela' guagw, no yezj šiš, no trigw, no burr bžina', no xila', no cabayw, no carret, na' no be_{nach} be_{ne}' yesote' ca beyixe'. ¹⁴ Na' be_{ne}' güen delgens ca' yesene' che ciudan':

—Ba gwde che yogo' da' zix ca' na' yogo' bichle da' ca' gosazlaže' be_{ne}' Babilonia ca' yesezi'e lo yela' gw_{ni}'a chegaquen'. Gwbatech yesezi'e da' ca'.

¹⁵ Na' be_{ne}' güen delgens ca' be_{ne}' gosote' da' ca' gosezi' be_{ne}' Babilonian', ben' gosata' yela' gw_{ni}'a chegaque' neche be_{ne}' Babilonia ca', yeseze' zito'le yesežebchgüe' che dan' chesežaglao be_{ne}' Babilonian'. Na' yesebeže' na' yesegüine'de', ¹⁶ na' zižje yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Be_{ne}' gwže' ciudan' gosazchgüe' lache' šagüe' lache' zaque', no lache' moradw na' no lache' x_{na}. Gosonchgua cuingaque' xdan len oro, len yej zaca' da' chesactiten, na' len perlas. ¹⁷ Perw na'a zezenez gwžiai' yogo' da' šagüe' chegaquen'.

Yogo' xan barcw ca', yogo' be_{ne}' ca' chja'ac lo' barcw ca', len be_{ne}' ca' cheson žin lo' barcon' na' nochle be_{ne}' cheson žin lo' nisdaon', yogüe' yeseze

zito'le yesene'e. ¹⁸ Na' yesele'ede' chas žen cate' šey ciudan' na' yesene':

—Bina' gata' yeto ciuda yoble doxen lo yežlion' da' žinlaže' ca ciuda nga len yela' gwni'a yela' šagüe' chen.

¹⁹ Na' yosožia yo bište yichjague' da' yesyegüine'de', na' yesebežyaše', yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Neche yela' gwni'a che bene' ca' gwže' lo ciudan' yogo' chio' bencho gan xen len žin da' bencho len barcw checho quinga. Na' na'a zejzenez gwžiai' ciudan'.

²⁰ Perw le'e že'le yaban', le yebe. Le'e gwsela' Diosen' gogle postlw che', na' le'e gwsele' be'le xtižen', na' yezica'chle le'e zoale lo na' Diosen', le yebe. Le Diosen' ba gwchoglagüe' yesebiayi' bene' Babilonia ca' neche dan' bosochi bososaque' le'e.

²¹ Nach to angl gual bcose' to yej xen ca dan' chon žin gan' chi' molin xen, na' bzalen' lo' nisdaon', gwne':

—Can' gac che ciuda Babilonian', yeniten can' benit yej xen dan' bzala' lo' nisdaon', na' gwbatech le'echon da' yoble. ²² Gwbatech yosogole' arpa lo ciudan'; gwbatech yosocuež güecuež ca' no flauta no trompeta. Gwbatech žel bene' zjansed cont yesone' no xšinlaze' da' chosochine', neca yenecho sšag che bene' chesot len molin lo ciudan'.

²³ Gwbatech le'echo be'ni' che lámpara, na' gwbat-ech yenecho bene' cheson lni che yela' güesagna'. Yesebiayi' bene' güen delgens che ciudan' bene' zjanac bene' blao lo yežlion', le bene' Babilonia ca' ba goseziye'e bene' že' yogo' nación len yela' güäža' chegaquen'.

24 Beṇe' Babilonia ca' gosote' beṇe' goso'e xtiža' Diosen' na' nochle beṇe' gwlej Diosen' cont gosaque' lo ne'e, na' beṇe' ciuda nan' zjanape' dola' che yela' got che yezica'chle beṇe' gosot beṇe' doxen lo yežlion'.

19

1 Gwdena' benda' beṇe' zan juisyw beṇe' že' ya-ban' chesonxene' Diosen', na' nen zižje, chesene': Beṇe' güen juisyw nac Dios chechon'.

Ba bene' cont chio' chejnlaže'chone' zoacho len le'. Naque' beṇe' zaca' juisyw, na' nape' yela' guac xen.

2 Zejczye' to licha na' chone' can' cheyala'cze gac dan' chchoglagüe' yesezaca'zi' beṇe' bi chosozenag che'.

Ba gwchoglagüe' cuiayi' ciuda xen da' zaca'lebe ca to no'ole zle',

le beṇe' lo ciudan' gosego'oyele' beṇe' že' doxen lo yežlion'

cont bosozoe' Diosen' ca'ale bi gosonxene' le'.

Diosen' ba gwchoglagüe' cuiayi' laž beṇe' Babilonia ca',

le cheyala'cze yesezaca'zi'e da' gosote' beṇe' ca' gosonxen le'.

3 Nach da' yoble gosene':

—Beṇe' güen juisyw nac Diosen'. Toli tocanē chas žen gan' šey ciudan'.

4 Nach beṇe' blao ca' tapechoa na' beṇe' ca' tap beṇe' žia xil jasechaze' coscho'ale lo yon' gosonxene' Diosen' gan' chi'e chnabi'e, gosene':

—Can' cheyala' gac. Beṇe' güen juisyw nac Diosen'.

⁵ Na' benda' gwne to bene' do gan' chi' Diosen' chnabi'e, gwne':
 Yogo' chio' naccho bene' güen xšin Diosen' cheyal'a' gonxenchone',
 chio' chzenagcho che', chio' naccho bene' gole na' chio' naccho bene' xcuide' na' bi' bixjw.

Yela' güešagna' che ben' zaca'lebde' ca xila' daon' gosot bene' Israel neche xtol'a'gaque'

⁶ Nach benda' be xne che bene' zan juisyw chesonxene' Diosen'. Na' xtiža'gaquen' nenen ca chac ga chziž yegon' cate' dechguan na' ca nen cate' leca chašjw chtin, chesene':

jBene' güen juisyw Xancho Diosen'!

Len' nape' la'zelagüe yela' guac xen na' len' chnabi'e.

⁷ Chebechgüecho na' zoachguacho mbalaz chonxenchone'.

Le ba bžin ža gac yela' güešagna' che ben' zaca'lebde' ca xila' dao' be gosot bene' Israel neche xtol'a'gaque'.

Ba zoa no'olen' si'e gac xo'ole'.

⁸ Ba bnežjue'ne' lache' šagüe' da' nyaze', lache' šiš xila' juisyw.

Na' lache' šagüe' da' šiš xila' nyaze' zejen da' güen da' chon chio' ba gwlej Diosen' cont naccho lo ne'e.

⁹ Nach anglen' da' yoble gože'nda':

—Bzoj da' nga: “Mbalaz bene' ca' ba goxe' cont yesenite' cate' gac lni che yela' güešagna' che ben' zaca'lebde' ca xila' dao' be gosot bene' Israel neche xtol'a'gaquen'.”

Nach anglen' gwne':

—Diosen' gože' neda' dan' ba gwnia', na' naquen da' li.

¹⁰ Nach bzoa xiba' cont gonxena' anglen', perw anglen' bi be_{ne}' latje, gwne':

—Bi gono' ca'. Neda' naca' con to be_{ne}' güen xšin Diosen' can' naco' le' na' be_{ne}' lježo' ca' be_{ne}' bi chesebejyichje' xtiža' Jesúsen' da' chesejle'e. Benxen Diosen'.

Na' note'teze be_{ne}' cheso'e diža' li che Jesúsen', zoa Spiritw che Diosen' chzejni'in legaue' cont cheso'e xtižen'.

Be_{ne}' žia cože' cabayw šiš

¹¹ Nach ble'eda' yaban' ca to da' nyaljo, na' ble'eda' to cabayw šiš na' žia to be_{ne}' cože'ba'. Na' ben' žia cože'ban' zjansi'ene' Ben' Chon Con Can' Že' na' Cho'e Diža' Li. Zejczze' to licha can' chchoglagüe' saca'zi' be_{ne}' bi chosozenag che' na' can' chdillene' da' malen'. ¹² Na' ble'eda' yejlagüe' ca' chesactiten ca to yi' da' čala'nin, na' zjazoa zan corona yichje'. Na' ble'eda' nyoj yeto le' loxguen' da' nombia' toze le'. ¹³ Ble'eda' nyaze' to lache' da' dope chen, na' le' Xtiža' Dios. ¹⁴ Na' ble'eda' be_{ne}' zan be_{ne}' zjanac soldadw che Diosen' zjana'ogüe'ne', zjanyaze' lache' šagüe' da' nac da' šiš na' da' naquen xilaže', na' to to be_{ne}' ca' zjažie' tgüeje cabayw šiš. ¹⁵ Cho'a ben' le' Xtiža' Dios chchoj to spada da' nlachgua da' gwchine' čine' nación ca' bi chosozenag che'. Le nabi'e nación ca' na' žan ca žan yosozenague' che'. Na' gone' yesezaca'zi'chgua be_{ne}' ba goson da' malen', le Dios ben' nap la'zelagüe yela' guac xen chlocchgüe' can' ba gosonen'. ¹⁶ Na' le'e xcamise' na' le'e xichje' nyoj diža' quinga žan: “Naca' Rey ben' chnabia'

yezica'chle rey na' naca' Xan yezica'chle bene' gwnabia'."

¹⁷ Nach ble'eda' to angl bene' zecha lo gwbižen', na' bosye'e bol güiže' yogo' cuen šod ca' chesaš le'e yaban', gože'ba':

—Le da, le yedobe nga gagwle to xše' xen da' gon Diosen' gagwle. ¹⁸ Gata' xpela' bene' gwnabia', xpela' xan soldadw, xpela' no bene' gual. Gata' xpela' cabayw na' xpela' bene' gosebie'ba'. Gata' xpela' yogo' cuen bene', bene' gosac esclavos na' bene' bi gosac esclavos, bene' gosac bene' xcuide' na' bene' gosac bene' gole.

¹⁹ Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw čhegaque' ca'. Ba besedobe' txen cont yesedillene' Jesús ben' žia cože' cabayw šišen' len soldadw čhe' ca'. ²⁰ Na' bež nechon' gocba' lo na' Jesúsén'. Na' lecze ca' goc čhe bež xigüe' gwchope ben' choe' diža' güenlaže' na' bamba' yela' guac cont benachen' bosozenague' čhe bež nechon', cont gosonxene' l gua'a lsaca' čheba' na' cont gosezoe' señw čheba'. Chopteba' gosacba' lo na' Jesúsén', na' ca' zjambamba' bosozale'ba' lo' yi' gabil gan' čala'nin azufre, yi' xen da' nac ca' to nisdao'. ²¹ Nach bene' ca' yezica'chle, Jesúsén' ben' žia cože' cabayw šišen' betue' legaue' len spada da' chchoj cho'en', na' yogo' šod ca' gosagwxatba' xpela'gaquen'.

20

Can' gac lo to mil iz

¹ Na' ble'eda' to angl be_{ne}' zoa yaban' betje' cont gwsal_{jue}' yechw zitjwchgua dan' nac lo gabilen', na' no_xe' to gden xen. ² Na' anglen' be_xoe' bel ben' zoa gaž yichj, be bla' da' nechw ža gwlaste. Leba' chnabia'ba' da' xigüe' ca' na' leba' Satanás. Anglen' bcheje'ba' gden_{na}' to mil iz. ³ Nach be-
 yož bcheje'ba', na' bzale'ba' lo' yechw gabilen' na' la' bseyjw_{tie}' cho'a yechon' na' bchišen' to sey_w. Bene' ca' cont bich siye'ba' be_na_{ch} šlac bi_{na}' te to mil iz. Na' cate' ba gwde to mil izen', cana'ch yeseže'ba' gden_{na}' cont yechojba' yešlož dao'.

⁴ Nach ble'eda' be_{ne}' ca' gwlo'o Diosen' lo na'gaque' gosone' yela' justis che be_na_{ch} zjachi'e gan' chesenabi'e. Na' le_cze ble'eda' be_{ne}' bi gosonx-
 ene' bež xigüen' len l gua'a lsaca' cheba' ne_ca goso'e latje yosozoe' señw cheba' lo_xgagaque' o taca'gaque'. Gosenita'chache' goso'e diža' chese-
 jnilaže' Jesúsen' na' goseyixjue'ede' xtiža' Diosen'. Da'nan' be_{ne}' ca' besegue'ede' Diosen' gosote' le_gaque' gosechogue' yengaque'. Perw Diosen' bene' cont besyebane' ladjo be_{ne}' guat ca', na' txen len Criston' gosenabi'e to mil iz. ⁵ Cate'ch ba goc to mil iz besyeban be_{ne}' ca' gosenita'chach gose-
 jnilaže' Criston', ben' gosac be_{ne}' nechw besyebane' ladjo be_{ne}' guat ca', cana'ch yosbane' yezica'chle be_{ne}' guat. ⁶ Mbalaz nita' be_{ne}' ca' belis bosbane' ladjo be_{ne}' guat ca' da' nechw, be_{ne}' ba gwlej Diosen' cont zjanaque' lo ne'e. Bi yesac chegaque' can' gac che be_{ne}' ca' yesežaglagüe' neche xto_{la}'gaque' to_{li} to_cane, da'nan' žacho yela' got gwchope. San yesenite' yesonxene' Diosen' na' yesonxene' Criston', na' da'nan' guac na_cho yesaque' b_xoz. Legaque' yesenabi'e len Criston' to

mil iz.

⁷ Na' cate' ba goc to mil izen', Diosen' güe'e latje yechoj Satanás dan' chnabia' da' xigüe' ca' lo' yechw zitjwchgua dan' nac lo gabil gan' bseyjuen'.

⁸ Na' yechojen na' da' yoble siyen' bene' že' yogo' nación ca' že' lo yežlion'. Na' siyen' bene' ca' zjanzi' Gog na' Magog, gwtoben legaue' cont yesedillene' Criston', na' yesaque' bene' zan juisyw ca' yox da' chi' cho'a nisdao' da' nono chac gwlab. ⁹ Nach ble'edagüe'da' bene' zan juisyw ca', gosa'aque' doxen lo yežlion', ja'aque' gan' chi' ciuda dan' chaque Diosen' gan' že' bene' ca' gwleje' cont zjanaue' lo ne'e. Na' cate' gosechje' ciudan', Diosen' bene' cont bchoj yi' le'e yaban' bzeyteczen legaue'. ¹⁰ Na' ca nac Satanás dan' gwziye' bene' ca' že' yežlion', angl che Diosen' bosozalen' lo yi' gabil gan' čala' azufre, yi' xen da' nac ca to nisdao' gan' ba bosozale' bež xigüe' nechon' na' bež xigüe' gwchopen' ben' be' diža' güenlaže' cont gosonxen benachen' bež nechon'. Na' yesežaglaon do ža do yel toli tocanē.

Goc yela' justis che bene' ca' ba gosat

¹¹ Nach ble'eda' chi' Diosen' to lo siy xen da' nac da' šiš, chi'e chnabi'e. Na' čna'tie' yežlion' len da' ca' chle'echo le'e yaban' na' besyeniten, noch no besele'e len, na' gach ga gosac xišne'en ga yoble. ¹² Na' ble'eda' bene' ba gosat, bene' gole len bene' xcuide' len bi' bixjw, zjazeche' lao Diosen'. Nach Diosen' bzaše' libr ca' gan' zjanyoj yogo'lol da' goson to toe'. Na' gwdena' bzaše' libr gan' zjanyoj la bene' ca' zjanape' yela' mban toli tocanē. Na' bene' yela' justis čhegaue' con ca gosone' šlac

gosebane', le yogo' da' gosone' zjanyojen le'e libr ca'. ¹³ Yogo' bene' gosat lo' nisdan' besyechoje' zjazeche' lao Diosen', na' yogo' bene' gosat ga yoble lecze besyechoje' zjazeche' lagüe' cont bene' yela' justis che to toe' con ca gosone' šlac gosebane'. ¹⁴⁻¹⁵ Nach Diosen' bcueze' yela' goten' nombia'cho, na' bene' cont noch no gwže' latje che bene' guat ca' na' bnitlagüen'. Na' bene' bi bosozenag che Dios, yogo' bene' bi nyoj lagaque' le'e libr gan' nyoj la bene' zjanap yela' mban toli tocanē, bosozale' legaue' lo yi' gabil da' nac da' xen ca to nisdan'. Na' dan' goc chegaue', lenna' yela' got gwchope chegaue'.

21

Yežlion' na' le'e yaban' besyeyaquen da' cobe

¹ Gwdena' ble'eda' le'e yaban' ba beyaquen da' cobe na' lecze ca' yežlion', le yaba dan' goc da' nechw na' yežlio nechua' besyeniten. Na' lecze bich gota' nisdan'. ² Neda' Juan ble'eda' ciuda che Diosen', ciuda Jerusalén cobe da' chi' yaban' gan' zoa Diosen', betjen lo yežlion'. Ba nonen' xdan ca to no'ole bene' ba bpa'a cuine' cont naque' xdan cate' gwšagne'e. ³ Na' do gan' chi' Diosen' chnabi'e benda' gwne to bene' zižje, gwne':

—Gwna'šc, Diosen' ba betje' zoalene' benach. Soateze' len legaue', le gwleje' legaue' cont zjanaue' yež che', na' yesonxene'ne'. ⁴ Na' Diosen' gone' cont bich gac da' yesyeyaše'laže'de', da' yesyegüine'de' o da' yesebeže' chen. Nono gat, nono šey la, le ba gwde che yogo' da' ca' gota' lo yežlio nechon'.

⁵ Nach Dios ben' chi' chnabi'e gwne':

—Da' li ba chocoba' yogo'lol da' de.

Lecze gwne':

—Bzoj diža' quinga ba bendo', le naquen diža' li na' gac can' gwnian'.

⁶ Nach gože' neda':

—Bač goc da' cheyala' gac. Neda' naca' ben' ben yežlion' len yogo' bichle da' de, na' naca' ben' gon cont te čen. Da'nan' zaca'lebdā' ca letr nechw da' nzi' A na' letr bzebe da' nzi' Z. Note'teze beņe' chaclaže' si'e da' gwnežjua'ne', gwnežjua'ne' yela' mban toli tocaņe da' zaca'lebe ca nis ya'a da' che'ejcho cate' chbilecho, na' bi sia' laxjuen.

⁷ Na' beņe' chesejnilaže' neda', še ba gosezoede' bi yesebejyichje' xtižan', gac čhegaque' yogo' da' šagüe' da' ba bia' diža' čen, na' yesonxene' neda', na' gwlo'a zjanaque' xi'ina'. ⁸ Perw ca nac beņe' ca' chesežeb yosozenague' chia', beņe' bi chesejnilaže' neda', beņe' cheson da' ca' chgue'eda', beņe' chesot ljež beņače', beņe' cheson da' nac da' yela' zto' len cuerp čhegaque', beņe' cheson txen len bite'teze yela' guaža', beņe' chesejnilaže' l gua'a lsaca', na' yogo' beņe' cheso'e diža' güenlaže', yogo' beņe' ca' yesezaca'zi'e toli tocaņe lo yi' xen da' nac ca to nisdāo', yi' gabil gan' čala' azufren'. Na' da' gac čhegaquen', lenna' žacho yela' got gwchope.

Ciuda Jerusalén da' nac da' cobe

⁹ Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yela' zi' ca' la'zelagüe lo yežlion'. Gwbigue' gan' zoan' na' gože' neda':

—Da len neda' cont gwlo'eda' le' bene' ca' zjazaca'lebde' ca to no'ole za' gwšagna'. Na' Jesucristw ben' zaca'lebde' ca xila' dao' ben' gosot bene' Israel neche xtola'gaque', guac nacho le' si'e no'olen'.

¹⁰ Nach Spiritw che Diosen' benen cont gwyala'ena' anglen' to lo ya'a xen da' nac sibe, na' blo'ede' neda' ciuda Jerusalén da' nac ciuda che Dios. Ble'eda' gwzoan yaba gan' zoa Diosen' na' chetjen lo yežlion'. ¹¹ Na' ciudan' goctitchguan len be'ni' da' nsa' Diosen', na' ble'eda' chactiten ca to yej da' zaca'chgua, ca yej da' nzi' jaspe da' chle'echo ca vidrw. ¹² To ze'e xen da' nac sibe nyechjen ciudan', na' nita' šižinw puert chen, na' to to cho'a puerten' zecha tgüje angl. Na' le'e puert ca' zjanyoj la šižinw bene' ca' bosoxie' šižinw cuen diaža che neto' nacto' bene' Israel. ¹³ Na' le'e ze'e dan' zoa šla'a ciudan' gan' chla' gwbiž nita' šone puert, na' šla'a gan' chxoa gwbiž yešonen, na' šla'a zej yichjelen yešonen, na' šla'a zej xanelen yešonen. ¹⁴ Na' ze'e dan' nyechje ciudan', lenenna' naquen de šižinw yej xen, na' zjanyoj le'e yej ca' la šižinw neto' nacto' postlw che Jesucristw ben' zaca'lebde' ca xila' dao' ben' gosot bene' gualaž cheto' neche xtola'gaquen'.

¹⁵ Na' angl ben' be'len neda' diža' noxe' to ya da' nac de oro da' bchine' gwxi'e medidw ciudan', che ze'e chen na' che puert ca'. ¹⁶ Ciudan' naquen da' cuadradw, toze ca naquen zлага' len toņ. Anglen' bchixe' ciudan' len ya chen' na' goquen chope mil chope gayoa kilómetros to to šla'an, ca'te' ndonen, ca'te' zlagan' na' ca'te' siben'. ¹⁷ Nach bchixe' ze'e dan' nyechj ciudan' na' goquen gayontap metr

yela' sib chen, metr da' nombia' benach, le lenna' bchin anglen' gwxi'e medidon'.

¹⁸ Ze'e da' nyechj ciudan' naquen de yej da' zaca' da' nzi' jaspe, na' doxen ciudan' naquen de oro na' nlan' ca to vidrw da' nac xilaže'. ¹⁹ Na' ze'e da' nyechj ciudan', zjanone' lenen xdan len yogo' cuen yej da' zaca' da' de da' zjanac beya color na' chesactiten. Da' nechon' naquen de jaspe; da' gwchope de zafiro; da' gwyone de ágata; da' gwdape de esmeralda; ²⁰ da' gayo' de ónice; da' gwxope de cornalina; da' gaže de crisólito; da' xono' de berilo; da' ga de topacio; da' ši de crisoprasa; da' šnej de jacinto; na' da' šižinw de amatista. ²¹ Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de lo ciudan' naquen de oro na' zjanlan' ca vidrw da' nac xilaže'.

²² Bibi yodao' ble'eda' lo ciudan', le bene' ca' že' ciudan' zjanite' lao Xancho Dios ben' nap la'zelagüe yela' guac xen na' lao Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque'. Legaque' chesonxen bene' lo ciudan'.

²³ Bene' ca' že' ciudan' bi cheseyažjde' gwbižen' ne bion' yososenin' lo ciudan', le be'ni' da' nyechj Diosen' chsenin' len legaque' na' lecz ca' be'ni' da' nsa' Jesucriston'. ²⁴ Na' be'ni' che Diosen' gwsenin' len bene' za'ac yogo' nación bene' chesejniłaže' Diosen', na' bene' gwnabia' ca' že' yežlion' yesonx-ene' Diosen' yosonežjue'ne' bi da' zaca' da' šagüe' da' de chegaque', len no yela' bala'an da' de chegaque'. ²⁵ Bitw šeyjw puert ca' zjanita' ciudan' lagüe' ža, na' gwbat gac šeže'le. ²⁶ Can' ba gwnia', yela' zaca' yela' xdan da' zjade yogo' nación len yela' bala'an da' zjade che bene' gwnabia' che

nación ca', yosonežjuen' Diosen' lo ciudan'. ²⁷ Lo ciudan' gwbat gac šo' be_{ne}' chon da' zban. Bi gac šo' be_{ne}' chon bite'tez da' chgue'e Diosen' o be_{ne}' choe' diža' güenlaže'. Con be_{ne}' zjanyoj lagaque' le'e libr che Jesucriston' gan' zjanyoj la be_{ne}' zjanape' yela' mban toli tocanē, legacze' gac yeso'e na'.

22

¹ Nach anglen' blo'ede' neda' yegw gan' yože nis da' chnežjon be_na_{ch}en' yela' mban toli tocanē. Nisen' nacten ca vidrw le nyadichguan. Yegwna' chchojen do gan' chi' Diosen' chnabi'e txen len Jesucriston' ben' zaca'lebde' ca xila' dao' ben' gosot be_{ne}' gualaž cheto' ne_{che} xto_{la}'gaquen'. ² Na' gachol nez yo xen che ciudan' na' chop la'a cho'a yegon' ze yag da' chnežjon be_na_{ch}en' yela' mban toli tocanē. Na' yogo' bio' chesebian frut, šižinw ni'a chesebian lao tgüiz, na' be_{ne}' nación ca' yoso_{ch}ine' x_{la}guen_{na}' ca rmed cont yesenite' güen. ³ Gwbat gata' bi da' chgue'e Diosen' lo ciudan', le ciudanan' cui'e nabi'e txen len Jesucristw ben' zaca'lebde' ca xila' dao' ben' gosot be_{ne}' gualaž cheto' ne_{che} xto_{la}'gaque', na' yogo' be_{ne}' že' ciudan' yesonxene' le'. ⁴ Yesenite' yesele'ede' cho'alao Diosen', na' yoj la Diosen' loxgagaque'. ⁵ Gwbatech gac šeže'le lo ciudan'. Na' be_{ne}' že' lo ciudan' bi yeseyažjde' be'ni' che no lámpara o che gwbiž, le be'ni' da' nye_{ch}j Xancho Diosen' gwsen_{in}' len legaque'. Na' yesenabi'e len le' toli tocanē.

Ba zoa yid Jesucriston' da'yoble

⁶ Nach anglen' gože' neda':

—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' beṇe' cheso'e xtižen' na' chzejni'ide' leḡaque' bin' yesene', na' len' ba gwsele' neda' chzejni'ida' le' len beṇe' lježo' ca' chesonxene' Diosen' cont gacbe'ele da' ca' za' gac.

⁷ Nach gwna Jesúsen':

—Da' li ba zoa yida' da' yoble. Na' mbalaz beṇe' chosozenag che da' ca' ba bzojo' le'e libr chio' choen' diža' che da' ca' za' gac.

⁸ Neda' Juan benda' na' ble'eda' da' quinga ba bzoja' nga, na' beyož bendan' na' ble'edan' jazoa xiba' xni'a angl ben' blo'e neda' da' ca', godca' gonxena'ne'. ⁹ Perw anglen' bi beṇe' latje, gwne':

—Bi gono' ca', le naca' con to beṇe' güen xšin Diosen' can' naco' le', can' zjanac beṇe' lježo' ca' ba gwleje' cheso'e xtižen', na' can' zjanac yogo' beṇe' yosozenag che da' ca' ba bzojo' le'e libr chion'. San benxen Dios.

¹⁰ Lecze gože' neda':

—Bi gwcuašo' diža' ca' ba bzojo', le ba zoa gac da' ca' bzojon'. ¹¹ Na' beṇe' cheson da' mal, yesonhcze' da' malen' chesonen'. Na' beṇe' cheson da' yela' zto', yesonhcze' da' yela' zton' chesonen'. Na' beṇe' cheson da' chazlaže' Diosen', yesonhcze' da' güenna' dan' chesonen'. Na' beṇe' ba gwlej Diosen' cont zjanaque' lo ne'e, lo ne'en yesyega'anče'.

¹² Nach Jesúsen' gozne':

—Da' li ba zoa yida' da' yoble, na' yedeyena' gac güen che to to benach o saca'zi'e con can' ba ben to toe'. ¹³ Neda' naca' ben' ben yežlion' len yogo' bichle da' de, na' naca' ben' gon cont te chen.

Da'nan' zaca'lebda' ca letr nechw da' nzi' A na' letr bzebe da' nzi' Z. Ba zoa' cate' gwxe yežlion' na' soacza' cate' te čhen.

¹⁴ Mbalaz beŋe' ca' nita'teze' chesenabe' yeca'a xtoła'gaque' cont yesaque' txen len beŋe' ca' ba ble'edo' ben' ba besyeyach xalana'gaque'. Legaue' gac yesagüe' frut dan' chbia yag yela' mban toli tocanē, na' gac yeso'e cho'a puert che ciudan'.

¹⁵ Perw ca nac beŋe' ca' cheson da' nac da' zban, beŋe' ca' cheson txen len no yela' guaža', beŋe' cheson da' nac da' yela' zto' len cuerp čhegaue', beŋe' chesot ljež beŋače', beŋe' chese-jnilaže' l gua'a lsaca' o bi da' ca' ben Diosen', na' yogo' beŋe' cheso'e diža' güenlaže' o chesyebede' chosozenague' dan' zjanac ca', yogo' beŋe' ca' bi gac yeso'e lo ciuda čhian'.

¹⁶ —Neda' Jesús ba gwsela' angl čhian' cont ba bzende' le' yogo' da' ca' ba bzojon'. Na' cheyala' gwnežjon' beŋe' ca' chesedop chesežag chesonx-ene' neda'. Neda' naca' xi'in diaža che da' rey David na' naca' ben' gwsela' Diosen' yežlion' lo diaža che'. Na' zaca'leba' ca beljw xsil.

¹⁷ Spiritw che Diosen' na' lecze ca' chio' chonx-encho Jesúsēn' chnablaže'cho yob yidšca Jesúsēn' da' yoble, chio' zaca'lebcho ca to no'ole si'e. Na' yogo' beŋe' yesene diža' quinga lecze yesenablaže'sšque' yide' da' yoble.

Na' note'teze beŋe' chaclaže' si'e da' gwnežjw Jesúsēn' le', cheyala' yedenaben', na' gwnežjue'ne' yela' mban toli tocanē da' zaca'lebe ca nis ya'a da' che'ejcho cate' chbilecho, na' bi si'e laxjuen.

¹⁸ Na' chosnisda' le'e chzenagle can' ža libr nga che da' ca' za' gac, note'tezle še gwzanchle ca dan'

ža libr nga, Diosen' gone' gac chele yogo' yela' zi' dan' zjanyoj le'e libr nga. ¹⁹ Na' note'tezle še žale bi gac yogo' da' qui zjanyoj le'e libr nga, Diosen' yoxie' lale le'e libr chen' gan' nyoj la bene' ca' zjanape' yela' mban toli tocanē na' gone' cont bi gac šo'le lo ciuda chen', nēca gac chele yogo' da' güen da' zjanyoj le'e libr nga.

²⁰ Nach Jesús, ben' bzejni'ide' neda' yogo' da' ca' ba bzója', že':

—Da' li ba zoa yida' da' yoble.

Na' neda' chapa'ne':

—Ca' gacšca. Yob yidšco', Xana' Jesús.

²¹ Xancho Jesucriston' soacze' gaclenščacze' yogo'le. Da' na'zen' chzoja'.

Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
de7d40fb-3909-53d8-8bea-744cf1ce0e41